


三原縣新志

序

DS
793
S452
S357
1880
V.2



三原縣新志卷之四

知縣焦雲龍重修

邑人賀瑞麟編纂

祠祀志第四

記曰禱祠祭祀供給鬼神非禮不誠不莊書曰黷于祭祀時謂弗欽今一邑秩祀具載會典固宜嚴敬而法所當祀或惑以世俗之見豈孔子敬遠之義是亦諂而已矣正道微異端盛淫祠多於家廟邪說信於六經又何怪其然耶佛老不息聖賢不著學校烏乎端風俗烏乎美有興學變俗之責者尙先於祠事一
考正哉

聖廟在縣治右元大德十年邑人張德明輸財度地勸建於此

王康僖廟學闢路記云卽希夷道院爲之

縣尹眞定郭眞始構大成殿三楹後長安

王天民增建戟門五楹東西兩廡各九楹至正十年縣尹李誠

二十八年河南行省左丞陳思道明洪熙元年知縣宋麟縣丞
樊用主簿范敬士夫張景皆重修各有記至成化十二年知縣
李景繁以宮牆未合制度改建大成殿五楹兩廡十餘楹櫺星
門戟門皆三楹而殿上施琉璃脊獸四垂碧瓦提學伍福爲之
記正德十二年知縣鄭本公 國朝康熙二十一年知縣葉章
期三十四年知縣俞璉四十六年權邑事西安通判張晟雍正
三年知縣呂瑚乾隆元年知縣李昌宗亦皆有修葺三十二年
知縣張象魏撤舊更新兩廡各增爲三門正殿泮池環以石欄
惟櫺星門未盡合制生員申鵬祥以聖廟特典屢陳當事請遵
類宮禮樂全書爲釐正閱歲壬辰南鄭令蒲州崔龍見視縣事
以典禮所在卽允其請割俸倡修一循定制道光十六年知縣
陸銓以歲久就圯議重新邑人郎中胡肇基輸貲鳩工垂成旋

被火復修如制大成殿右爲

崇聖祠明嘉靖九年建名啓聖祠 國朝雍正元年以向係專

祀叔梁公今合祀五代易曰崇聖乾隆三十三年知縣張象魏

重新道光十六年胡肇基又重新戟門外東曰名宦祠西曰鄉

賢祠

大成殿正位據方觀承壇廟祀典臺高三尺五寸廣一丈三尺神龕高一丈二尺神牌高七尺二寸廣四尺厚一

寸二分座高一尺二寸廣四尺五寸硃地金書

至聖先師孔子 正位南嚮

東西四配位臺高三尺四寸廣一丈神龕高九尺神牌高三尺六寸廣九寸厚一寸座高七寸廣一尺三寸

赤地金書

復聖顏子 述聖子思子 俱東位西嚮

宗聖曾子 亞聖孟子 俱西位東嚮

東西十二哲位臺高三尺四寸廣二丈神龕高七尺七寸神牌高三尺四寸廣六寸厚一寸座高四寸五分

分廣一尺二寸赤地金書

先賢閔子損

冉子雍

端木子賜

仲子由

卜子商

有子若

俱東序西嚮

先賢冉子耕

宰子予

冉子求

言子偃

顓孫子師

朱子熹

俱西序東嚮

東廡先賢四十人

神牌高一尺九寸廣四寸五分厚五分座高二寸二分廣七寸五分紫地青書

公孫僑

林放

原憲

南宮适

商瞿

漆雕開

司馬耕

梁鱣

冉儒

伯虔

冉季

漆雕徒父

漆雕哆

公西赤

任不齊

公良孺

公肩定

鄒單

罕父黑

榮旂

左人郢

鄭國

原亢

廉潔

叔仲會

公西與如

邽巽

陳亢

琴張

步叔乘

秦非

顏噲

顏何

縣亶

牧皮

樂正克

萬章

周敦頤

程顥

邵雍

西廡先賢三十九人

神牌同

蘧瑗

澹臺滅明

宓不齊

公冶長

公皙哀

高柴

樊須

商澤

巫馬施

顏辛

曹卹

公孫龍

秦商

顏高

壤駟赤

石作蜀

公夏首

后處

奚容蒧

顏祖

句耕疆

秦祖

縣成

公祖句茲

燕伋

樂歆

狄黑

孔忠

公西蒧

顏之僕

施之常

申棖

左邱明

秦冉

公明儀

公都子

公孫丑

張載

程頤

東廡先儒三十四人

神牌同

公羊高

伏勝

毛亨

孔安國

后蒼

許慎

鄭康成

范甯

陸贄

范仲淹

歐陽修

司馬光

謝良佐

羅從彥

李綱

張栻

陸九淵

陳淳

眞德秀

何基

文天祥

趙復

金履祥

陳澧

方孝孺

薛瑄

胡居仁

羅欽順

呂柟

劉宗周

孫奇逢

張履祥

陸隴其

張伯行

西廡先儒三十三人

神牌同

穀梁赤

高堂生

董仲舒

劉德

毛萇

杜子春

諸葛亮

王通

韓愈

胡瑗

韓琦

楊時

尹焞

胡安國

李侗

呂祖謙

袁燮

黃榦

蔡沈

魏了翁

王柏

陸秀夫

許衡

吳澄

許謙

曹端

陳獻章

蔡清

王守仁

呂坤

黃道周

陸世儀

湯斌

崇聖祠正殿三間

臺高三尺五寸神龕高九尺三寸神牌俱高三尺四寸廣九寸五分厚八分座高六寸五分

分廣一尺四寸硃地金書

肇聖王木金父

正位

裕聖王祈父

左

詒聖王防叔

右

昌聖王伯夏

次左

啟聖王叔梁紇

次右俱南嚮

東西五配位

臺高三尺四寸神龕高六尺四寸神牌高二尺二寸廣六寸厚六分座高三寸廣一尺赤地金

書

先賢孔氏孟皮

顏氏無繇

孔氏鯉

西嚮

先賢曾氏皙

孟孫氏激

東嚮

東西廡先儒五人

同上

周氏輔成

程氏珦

蔡氏元定

西嚮

張氏迪

朱氏松

東嚮

按兩廡先賢儒位次舊多舛錯未盡如制茲依新刻文廟祀位並近請從祀飭文考訂詳載志家每謂事涉國典天下通行自不必書然呂涇野高陵志中特列禮儀抄畧謂縣中典禮儀節頗有差漏詰之禮士率多不知而博士掌故亦無其籍因抄示諸生與之肄業今國朝會典通禮及吾學錄諸書見者實罕習俗荒陋狃安故常故謹著其要以爲講明遵守之資

又按壇廟祀典附論正殿主高二尺三寸七分廣四寸厚七

分座高四寸長七寸厚三寸四分東西配主高一尺五寸廣三寸二分厚五分座高四寸長六寸厚二寸八分東西哲主高一尺四寸廣二寸六分厚五分座高二寸六分長四寸厚二寸兩廡主與東西哲同崇聖祠正位主與正殿東西配主同配位從祀主與十二哲兩廡從祀主同今廟中神牌不知何時製造皆與定制不合所謂定制又不知何據會典通禮皆未明載縣中 聖廟各主均有不符前據壇廟祀典附注其下並附錄此說以俟考

大清會典歲以春秋仲月上丁致祭正官將事佐貳分獻監禮以師儒贊引執事以生員中和韶樂羽籥之舞及牲登鉶簋簋籩豆尊爵之數將事之儀均如太學丁祭禮通禮 崇聖祠同時致祭陳設行禮並如太學 崇聖祠祭儀 直省月朔釋菜

望日上香教授教諭訓導等官分班行禮與太學同

會典

先師位前帛一牛一羊一豕一登一鉶二簠簋各二

籩豆各十尊一爵三鑪一鑪二四配各帛一羊一豕一鉶二

簠簋各二籩豆各八爵三鑪一鑪二東西各尊一十二哲各

帛一鉶一簠簋各一籩豆各四爵三東西各羊一豕一尊一鑪

一鑪二兩廡二共一案每位爵一每案簠簋各一籩豆各四

東西各羊三豕三統設香案二每案帛一尊一爵三鑪一鑪二

具牲載於俎帛四配異篚十二哲東西共篚尊實酒疏布幕勺

八爵三尊一鑪一鑪二配位各帛一簠簋各一籩豆各四爵

三東西各羊一豕一尊一鑪一鑪二兩廡東二案西一案均

簠簋各一籩豆各四每位爵一東西各帛一羊一豕一尊一鑪

一鑪二俎篚幕勺具登實太羹鉶實和羹簠簋實稻粱簠簋

黍稷籩實形鹽羹魚棗栗榛菱芡鹿脯白餅黑餅豆實韭菹

醯醢苴鹿醢芹苴兔醢筍苴魚醢脾析豚拍四配崇聖祠

正位籩實無白餅黑餅豆實無脾析豚拍十二哲無太羹

聖廟兩廡崇聖祠配位兩廡無太羹和羹籩實無棗魚榛菱

芡豆實無韭苴醯醢苴魚醢

吾學錄謹案直省祭品如不能備各就土之

所有以類充不得以他祀品物通融借用

會典先師廟設中和韶樂於兩階金罇鍾一編鍾十有六

在東玉特磬一編磬十有六在西皆懸以簠業東應鼓一祝一

麾一西敵一東西分列琴六瑟四簫六篴六篴四
排簫二塤二笙六搏拊二旌二羽籥三十有六

吾學錄謹案直省惟無
金鈎鍾玉特磬餘同

名宦祠所祀古今六十四人

木主高一尺九寸廣四寸五分
座高二寸二分廣七寸五分綠

地青書臺高二尺
五寸統長三丈

晉縣令杜軫

唐縣令王播

史憲中

典史陳藏

器

宋縣令呂大均

金縣令蕭邦傑

元縣尹趙

公諒

李誠

陳思道

朱春

主簿雷貴

典史張繼祖

明知縣陳榮

劉耽

楊聰

朱芾

李景繁

龐輔

馬龍

謝鵬

程啓充

張治

穆甯中

高進孝

張應徵

沈琦

李棲鳳

何朝宗

楊之璋

姜兆張

涂有祐

李昌

劉昌

陳展頌

教諭解鏘

張本

劉亮

張奎

張信

訓導王藻

段徽

縣丞郭忠

邢彪

白廷佐

魏泰徵

主簿劉信

劉純

趙昂

國朝知縣李溥

駱復旦

林遜

徐勅

俞璉

李瀛

余庚陽

教諭黎時雍

白補宸

王袞

王體正

訓導喬琯

縣丞朱廷楷

林元燾

典史鍾詮

何士鳳

鄉賢祠所祀古今八十三人

主式同上

吉茂

吉翰

毛遐

毛鴻賓

毛鴻顯

劉宏基

李靖

韓仲良

韓瑗

李朝隱

路嗣恭

路應

路恕

任圜

楊達夫

郝天挺

來恭

王孟常

趙天泰

李節

段信

焦玪

咎恭

王恕

王承祥

王承裕

張曉

張原

馬理

雒昂

李伸

秦偉

皆復性

任舜臣

穆相

趙瀛

來聘

皆如心

皆如思

胡汝安

皆約

溫純

溫編

溫予知

李士達

雒遵

雒于仁

來儼然

來復

王紹先

皆雲鶴

皆雲鵬

賈守正

周仕

房增耀

楊春芳

李恆茂

焦源清

焦源溥

魏良槐

張守約

秦一鵬

張耀

薛大中

王之鼎

黨還醇

秦三輔

喬巍

秦樂天

秦熙

王健

石隆

孫璜

梁加琦

岳映斗

楊在陞

侯于唐

李彥瑁

王焯

陳嘉績

馬榮宗

李演

李廷佐

忠義祠張志在

聖廟南雍正元年建後移建儒學北道光中

邑人李懷蔭捐貲重修

主式同鄉賢

節孝祠張志在

聖廟南雍正元年建乾隆三十一年知縣張

象魏重新乾隆壬子移建忠義祠北

主式同上

會典名宦鄉賢忠義節孝四祠歲春秋釋奠禮畢教諭一人公服詣祠致祭各帛一羊一豕一豮四豆四尊一爵三鑪一鐙二讀祝望燎承祭官行三叩禮如儀

社稷壇在縣城西明舊志唐制以石爲主宋祥符四年頒壇於天下社以后土勾龍氏配稷以后稷氏配元因之壇南植栗木爲表明洪武初社稷分爲二壇八年併爲一壇北向東西二丈五尺南北如之高一尺四寸四分出陞四陞三級壇下九丈五尺東西南各五尺繚以周垣門四由北門入石主高二尺五寸方一尺一寸剡其上培其下於土中木主二左題曰縣社之神右題曰縣稷之神朱漆青字旁有神廚齋宿等屋通禮直省府

州縣各建

社稷皆

社右

稷左異位同壇

案壇高二尺一

寸方二丈五尺會典歲以春秋仲月上戊日用鉶二簋二籩四豆

四爵帛各一其羊一豕一尊一致祭雍正十二年奉文重修築周牆五十四丈

先農壇在縣城東張志 國朝考古創建藉地四畝九分正殿

三楹祀先農之神殿下東西房各一楹中築土爲壇制同社稷壇 繚

垣七十丈大門一楹神位高二尺四寸寬六寸座高五寸寬九

寸五分紅牌金字會典歲以仲春吉亥致祭知縣率老農行九

推禮祭品行禮與祭社稷同道光中知縣高傳薪重修有碑記

風雲雷雨山川壇在縣城南明舊志壇南向廣袤與社稷壇同

木主三中題曰風雲雷雨之神左題曰本縣山川之神右題曰

本縣城隍之神會典歲以春秋仲月諏吉致祭餘儀與祭社稷同 乾隆

二十七年知縣李含初與社稷壇皆請帑重修道光中知縣高

傳薪又各重修

邑厲壇在縣城北會典於每年清明七月望十月朔用羊三豕
三米飯三石並香燭酒醴楮帛以祭本境無祀鬼神咸以有司
承祭祭日豫設城隍神位於壇行禮

安州志論祀事之失嚴敬曰壇壝廟宇宿莽積塵神主龕籠
傾欹破毀几案皆烏獸之迹庭除有人畜之糞及祭祀屆期
齋戒視爲虛文執事何嘗告戒拂拭者濁膩重重滌濯者汚
垢班班菹醢不問生熟犧粢未知精潔帶泥連草之菁芹含
蛙蒙塵之棗栗凡有供陳盡託僕隸師生不躬親有司不省
視陸稼書曰今天下如此者多矣豈獨安州哉魯秉周禮禘
自旣灌而往夫子猶不欲觀而況如今日乎知禮君子其知
敬畏哉其知敬畏哉予故錄此以爲輕蔑祀事者或有所警

省云

城隍廟在縣城白渠北張志明洪武八年知縣杜康祖建嗣屢經重修有碑記廟内外有市廛數十歲取租錢隨時修葺咸豐二年邑人內閣中書李錫齡妻劉氏捐貲重修

城隍古不列祀典自唐李陽冰爲縉雲令禱雨有應爲新其廟宋以後始多今則通州縣有之在易之爻辭城復于隍禮之八蜡水庸爲隍爲城此雖名所由起而亦未有如今之爲壇爲廟然旣祀之矣則亦地祇之類其神之也固矣而廟後又立寢殿室中儼設婦人像與神並坐號爲城隍之配夫城隍土神安有人形貌乃竟垂旒端冕配亦冠帔且置衾牀盥沐之具正陳北溪論泰山之神不知何山可以當其配而爲夫婦耶胡五峰辨南嶽謂世俗塑像爲立配爲男女屋而貯

之褻瀆之甚張南軒又曰川流山峙其形也而人之也何居
氣之流通可以相接而字之也何居卽城隍可知矣是皆會
典所不載

明洪武諭令造爲木主毀其塑像昇置水中取其泥塗壁繪以雲山其在兩廡者亦如之人心

之迷一至於此爲有司者曾不之禁其亦未知所以事神者
矣又況踵佛氏之謬說兩廊之中裝塑閻羅地獄變相刀山
劍樹六道輪迴將以警眾駭愚而不知奔波男女焚香頂禮
以爲真有其神可以生死禍福惑世誣民使人心盡溺於邪
誕妖妄而不知止可勝嘆哉且神者聰明正直之謂顧乃造
建歌樓演唱雜劇導淫敗俗失業耗財舉國若狂視爲固然
以此敬神慢孰甚焉陸稼書嘗痛革之至如城隍誕日尤爲
附會不經吾學錄所謂遊神街衢鼓爆喧聒甚則械手檻軀
謂可保壽赭衣縲絏求免殍殤此則南方陋俗縣中尙未有

是故不論

文昌宮卽文昌廟在縣北城東街始建未詳嘉慶中邑人李潤

重修治城巽方城上閣康熙中知縣湯爲雯建道光中知縣高

傳薪重修祭儀俱依會典今縣城譙樓皆祀配以奎星按文昌

戴筐六星古亦祀之貌而像之道家之說也奎星亦然俗又誤

爲魁陸稼書謂三代以上天神地祇亦無廟而祭者有修文昌

祠記附載于此文昌何神也司馬遷天官書曰斗魁戴筐六星

爲文昌一曰上將二曰次將三曰貴相四曰司命五曰司中六

曰司祿周禮大宗伯以槱燎祀司中司命月令季冬之月畢祀

天之神祇鄭康成謂司命司中與焉然則文昌天神也星有六

各有攸司而統之曰文昌蓋道之顯者謂之文昌天神也星有六

於道明乎非有道者不得與凡世之不以道而得將相祿命者

皆非文昌之所授占之祀之者蓋所以答其默相道統之功而

非教人禱祀以求寵利也近世祀文昌者不復分司中司命而

統之曰文昌從其重者爲主猶未大遠乎古但祀之之意專以

求富貴功名而不知有道則已失其本而又雜以道家不經之

說謂上帝命梓潼神掌文昌府事及人閒祿籍元時遂加號爲

帝君按所謂梓潼神者相傳姓張諱亞子其先越巂人因報母

仇徙居劍州之七曲山仕晉戰沒人爲立廟梓潼嶺上唐明皇

西狩追封左丞僖宗入蜀封濟順王宋咸平改封英顯是則文

昌者天神也梓潼者人鬼也合文昌梓潼而一之不经甚矣即以梓潼神配文昌如棄之於稷勾龍之於社然梓潼神非可以配文昌者也配文昌者自孔子而下宜莫如四配十哲及兩廡從祀之先賢先儒擇一而配焉可也於梓潼何有哉以梓潼配文昌猶不可而況直呼梓潼爲文昌而不復知有戴筐六星司命司中者耶在人則有至聖孔子及先賢先儒在天則有文昌皆教人以正誼明道而一切計功謀利之私知有富貴功名而不知有道及假道以干富貴功名者孔子之所擯文昌之所擯也明乎文昌之所以爲文昌庶幾俎豆馨香來格來享不吐而棄之乎

八蜡廟在東關正東門內明萬厯中重修 國朝康熙中邑進

士侯宏基樊咸修重修乾隆二十六年邑人胡瑛道光七年胡肇基皆重修

按禮八蜡鄭注先嗇一司嗇二農三郵表畷四猫虎五坊六水庸七昆蟲八張橫渠疑昆蟲害苗不當祭而陸稼書謂祭其主昆蟲者又以古祭八蜡在十二月近代於春秋丁祭後蓋取春祈秋報之意亦各有義

馬神廟在縣城內管驛巷明成化二年創建 國朝康熙四十年知縣李瀛重修一在東關東門內東門廟久圯亂後紳民重

修並增牛神改名三道廟知縣余庚陽有碑

按馬神即天駟房星周禮校人春祭馬祖是也世並祀牛神牛亦星而皆塑像則二氏之說宜深擯之

太白廟一在南關 國朝順治庚寅重修一在東關門外明萬

曆十八年建回亂燬

龍神廟在城隍廟內之右

按古無祀龍者宋始有五龍九龍堂乃以祈雨伊川破橫渠龍女事謂龍獸也豈可被人衣冠其論甚正稼書云今之龍王或地祇之主龍抑古篆龍御龍之類然廟貌冕服擬於王者則怪誕甚矣

火神廟在顯聖廟內之左

關廟在城隍廟左明知縣李棲鳳建張志 國朝雍正三年追

封三代公爵供奉後殿每歲春秋有司以太牢致祭如 聖廟

例乾隆中重修光緒丙子知縣趙嘉肇重修

按陸稼書曰關公正直之人沒為明神祀之可也然今之尊關公者皆因道家之說往往多証知禮者其辨之

劉猛將軍祠在南門外道光十七年知縣陸銓建

按會典神名承忠爲元指揮能驅蝗元亡自沈於河世稱劉猛將軍雍正二年奉旨廟祀

唐高祖獻陵在縣東北四十里白鹿原上長安志在三原縣龍池鄉唐朱里封內二十里下宮去陵五里會典陝西三原縣祭李衛公祠在學古書院南邑尙書王康僖建少保溫恭毅重修李志左爲李恭甫右爲馬雲岩配祀後知縣程鳳翔改扁三賢祠

朱公祠在南門甕城內元至正二十七年縣令朱春夫婦死節明嘉靖十四年建祠王康僖有碑記見原獻文錄 國朝康熙四十二年知縣李瀛重修

彰德祠在 聖廟西爲王端毅勅建賜額曰彰德 國朝乾隆三十一年知縣張象魏重修

報功祠在儒學南明萬厯中爲溫恭毅建

忠烈祠在縣治北李志明崇正五年勅贈光錄寺丞原任良鄉

知縣邑進士黨還醇在任徇難勅建以上六祠皆歲春秋二祀

祀者國之大事祀典所在悉載之有非令甲而民間可得通

祀且最著者列於後餘固不得詳也然雖當祀而不知考禮

亦略辨之以俟後之君子

東嶽廟

在北城東門內按東嶽非境內山祭之非禮

西嶽廟

在縣西北三里一在陵前鎮後按俗傳東嶽主

生西嶽主死詩曰維嶽降神生甫及申豈獨指東嶽哉妄甚矣

后土廟

在縣東北四十里唐村神泉谷中本名太甯宮

唐勅建歷代重修來每歲三月享賽爲關中勝會同亂被燬

國朝乾隆中重修明以聖母廟

在城隍廟左卽后土

神易坤爲土爲母或曰卽古郊禘之神一在縣東青東坊

元君廟

在縣南門外亦取坤元義卽聖母

屯軍廟

卽關廟在真武廟

在北城永清坊本北方元冥水神道

書傳會爲靜樂國王太子近於怪矣

顯聖廟

在城隍廟左碑記

郝忠定祠

在樓底鎮廢

楊子江祠

在縣東北隅

濟涉祠

在龍橋北

謝公蘭祠

在北城東門內

劉公昌祠

在儒學北今為節孝祠

李公溥祠

在縣治北

恩德祠

在鐘樓北為知縣李瀛建有碑同治中邑人附奉監利余公祿位

佛老之害人心甚矣邑之寺觀張志約三十餘所今悉削之
所以黜異端也薛文清公謂惟曲阜縣無佛寺聖人之澤豈
不遠哉程子又曰必盡去寺觀則天下治有心世道者正不
可不嚴其防蓋一鄉數里閒或無學舍而淫祠遍村堡綱常
民彝之壞非一日矣今遭回火幾盡或反為廓清之資而正
學將明移風易俗者庶幾有所藉手云

學校儒學在縣治北舊在大成殿後明初以其迫隘洪武二年
縣丞仰山卽舊洪福寺創建明倫堂五楹進德修業二齋各五
楹講堂西號房二十二楹前豎桂林坊嘉靖五年堂後建敬一
亭三楹內豎敬一箴碑萬厯閒溫恭毅重修明倫堂兩壁嵌石

刻科貢題名記堂上豎臥碑一學田碑一其後知縣楊之璋又
重建博約二齋十楹儀門三楹廚房三楹廁房一楹堂前周垣
增闊丈餘堂後閣亭築牆四圍有韓梅記 國朝康熙三十五
年知縣俞璉重修雍正三年知縣呂瑚倡紳復修

尊經閣在敬一亭後溫恭毅建閣可入武高十餘尋發書若干
卷皮置其中來復有尊經閣藏書引張志 國朝乾隆十五年

邑貢生高璘高珣詹事主簿高璵捐貲重修有知縣鍾一元碑

記

射圃在明倫堂之南久廢

王康僖承裕廟學闢路記云先是廟與學不相通必由櫺星門西行至牧

愛坊轉而北行歷衢陌之喧阗然後至學宏治乙卯巡按沁水李公瀚展廟畢當詣學有司以路迂白公異之曰廟學相通天下莫不然三原獨否殊乖禮制一生出對曰廟向有路以通於學後爲居民侵處尙有隙地闢而通之殆不爲難公屬知縣謝鵬驗之果然卽率役夫持畚鍤闢之不踰時廟學洞然爲一繚以崇垣甃以甬道復爲門以扁鎖之

入學額數張志向例太學科歲額取十五名雍正十一年督學
潘公允敏以三原文風較盛題准照府學額數取進文生員
二十名武生員十二名咸豐五年以捐輸永遠額加文武各一
名八年又額加文生員七名十一年又額加二名定額文生員
共三十名

學田

見田賦

義學縣城三北城一皆無定所近各鄉時設時止光緒六年知
縣焦公復設各鄉義學十有六

古昔聖王建學立師其所以教人之法則明德新民止至善
而已大學一書具在豈非萬世不刊之訓伏讀國朝會典
有曰州縣各於治所立學祀先師以崇矩範闡黌宮以
聚生徒時肄習以廣術業勤訓迪以儲人才又設義學以成

就無力讀書之士慎選文行兼優者延請爲師至籌給薪水膏火之費嗚呼至矣然求如胡安定之經義治事曹月川之明聖學化爭訟蓋未之嘗聞而博士倚席不講學舍鞠爲園蔬者比比矣至義學亦名存焉耳師道不立蒙養何端育才之本意殆不如是有志於斯者必思所以振興之哉

學古書院在城西北隅元延祐七年創建奉

宣聖及顏曾

思孟像於內集賢學士國子祭酒蕭𪔐有記

書院始於唐元和間衡州人李寬於

石鼓山南陞昇元中於廬山白鹿洞宋大中祥符間睢陽民曹誠卽葺同文舊居建學舍百五十間蓄書一千五百卷召明經義者講習及嵩陽嶽麓茅山皆聚徒教授肄業朝廷畀之九經賜以敕額時天下有四書院之稱是後江南諸郡凡先正過化之地皆置書院敬延儒先昭明斯道以尊前軌北方金氏百年所無也皇元奄有九圍敦尚儒術屢勅有司勉勵學校世祖元龍書召魯齋許公疇咨啓沃之餘命敎人於京兆成德者多爲時用今悉物故陝西行臺立魯齋書院以紹前人淑後學邦人興起焉是故端陽平水渭上亦有書院籍籍有成趣於是三原民李子敬暨弟子懋以己錢五萬繕築室儲書號曰學古蓋以

龍橋之名不經見三原雖爲治所或後復還故城故也暨落之
請鄉先生悅古程君主之慎獨白君繼之啓迪漸有成年部使
者聞之朝報下旌其門恭甫謂余曰願識書院之成事然非敢
矜也將俾此方之人新其耳目滌其靈府有以大變其風俗庶
乎後之人爲詩書家志願畢矣幸有以教之也辭曰師儒之職
安敢僭三請益勤乃勉以勿欲人知而爲後大毋以歲久而生
懈怠遂筆
其實以記又有明王端毅恕復學古書院記三原故有學古書
廢移其內所奉宣聖及顏曾思孟像於大成殿學古書院
碑於儒學本朝永樂中居民張秉等卽其地建三官廟然李子
敬義行碑尙在其中正統初街口坊牌猶大書書院街三字於
其上余爲諸生時嘗竊嘆曰書院乃儒生講學明倫之所所以
化民善俗而成才者也李君兄弟爲之可謂知所重其賢於鄉
人遠矣使其後有良有司或賢士大夫嗣而葺之書院烏得而
遂廢哉奈何鄉之人不徒視其廢而不能復顧乃以爲祠廟其
意豈不以爲祈福禳災保安一方非祠廟不可殊不知父子不
親兄弟不義鄉里不睦乖爭凌犯無所不至者教化不明人不
知道故也欲免禍而獲福胡可得乎況福善禍淫乃鬼神之職
苟享非禮之祭祐不善之人亦豈得爲鬼神乎誠使吾鄉復此
書院爲有司者延有道之儒以爲師選民間之俊秀以爲弟子
員俾之講學肄業於其中於以明綱常之道知修齊之理動遵
矩矱化洽閭里興仁興讓自無乖爭凌犯之非則福無不至禍
無不弭矣奚必諂瀆鬼神以祈禳之乎雖然民之惑於禍福也
久矣安得見道分明知所當務之君子以復之余之畜此志而

不遇其人亦已久矣成化二十二年余致事歸適提學憲副廣信婁君謙來臨吾邑課試之餘訪余於西園精舍因論四書院故事以及此書院興廢之由婁君遂令諸生具顛末下之縣以議復之知縣葛璋力不能爲且惑于浮議不果復是年冬余被召至京師明年是爲宏治元年婁君擢憲長復下其事於西安府太守廣平徐君政慨然以興復爲己任乃遣使至縣撤去三官神像卽其殿宇奉安宣聖及四配十哲像如故復移學古書院碑於內仍以舊額榜其門於戲百十年已廢之書院一旦復之非婁君見道分明知所當務疇克爾哉今濟南馬君龍以名進士來吾邑蓋有爲有守之士必能體二君之心以興起斯文爲己任擇師選士加意教養俾吾鄉爲詩書禮樂之區措斯民於平康仁壽之域成其卓異之才以爲邦家他日之用然後知吾道之有功淫祠之無益庶不負二君興復之盛意亦不遺後人徒復之譏誚斯爲善矣馬君勉之後之繼今者亦不可不勉是
通志嘉靖四十四年地震圯四十六年縣丞張九功重爲記

修按察使耀州喬世甯撰碑李志萬厯己未巡按傅振商重葺題傳心堂榜其門曰學古書院并詩二首匾刻正殿有碑記劉志
國朝雍正二年督學王公捐俸重葺延貢生袁仁林舉人孫碩膚相繼課士歲久復圯乾隆十四年邑太學門子超妻張

氏捐貲重修並建齋廊十楹於講堂左右甲申知縣張象魏查
出沿渠官地房租復勸捐數千金交商營運以供膏火辛卯知
縣崔龍見又增膏火皆有碑記見原故文錄嘉慶四年邑人劉
錫爵重修李廷佐捐增膏火道光初院長中書長安李饌商於
督學張公岳崧以書院爲陝甘兩省士子肄業所張公卽慨然
倡捐千金以增膏火後任督學馮公贊勳周公之楨皆捐如公
數旣周公相度王康僖宏道書院舊址勸貲重建以教兩省士
子仍以學古書院屬本邑同治戊辰余主講事又建藏書閣及
立雪亭並購書七百餘卷有記景賢祠在傳心堂南

宏道書院其始建詳明督學王雲鳳記

記曰宏道書院者三原王君天宇之所建也始

君舉進士卽侍父太宰公歸諸生秦偉馬理雖昂輩從之學假
僧舍以居題曰學道書堂君於後堂自構一室曰宏道書屋宏
治乙卯以太宰公命如京受職拜兵垣數月復以疾歸從者益
眾秦偉謀於眾欲作書院鉞疏通告於里之富而好禮者商賈

之遊於其地者鳩緡錢若干擇地之爽塏得永清坊之普照廢院其地以丈計袤四十廣十二遂白於官而肇工焉外爲繚垣門曰仰高以對南山仰止也重門曰恭敬內爲小垣三其門中日中立中立門內爲宏道堂後爲攷經堂又後爲春光亭宏道堂之東榮爲庖西爲庫堂前東西建學舍各十一楹攷經堂之東爲清風軒西爲明月菴門曰忠孝堂稍後東北隅爲清峪草堂西北隅爲嵯峨山房草堂之門曰臥雲山房之門曰立雪其學舍東曰遜志西曰省身草堂前甃石池滌硯久之墨凝池面若烏雲曰雲沼仰高門之內樹以梓育美材也中立門內以檜期棟梁也攷經堂前松柏與竹觀節操也春光亭前牡丹蓮菊與梅靚四時之造化也攷經堂後獨植杏思孔堂也名爲宏道書院鏤築堅緻繪畫樸素君筮日作孔子主率羣弟子行釋奠禮而後遷焉羣弟子請君正師席君誨之父子親君臣義夫婦別長幼序朋友信此爲學大道理博學審問慎思明辨篤行此爲學正功夫時哉不可失二子其勉之次日立教條二十自明德學道游藝以及會食歸甯咸有矩矱復出書數千卷廬之攷經堂君日處其中羣弟子辰至酉歸執經受業太宰公亦時過焉辨疑摘疵或終日不倦庚申予巡學校至縣聞而慕之遂就訪君見冠者數人童子數十人進退周旋惟謹冠者有堂上生徒堂外生徒之別童子亦分堂外堂下皆君以勤惰修竄而爲登降者未幾予遷去今年復來秦偉已舉進士馬理亦爲國子生去矣緡昂輩求予爲記嗟乎作書院而名爲宏道學者其有惕然於心者乎是道也君子之所以治身先王之所以治天下者也而今學者乃諱言之一有談及則互相告語以爲笑不

曰此其勉強則曰彼某事過某事不及夫勉強行道董仲舒能言之吾夫子亦有取於勉強而行者人豈能一生而聖哉世之放意恣情以爲不善者不議其非而乃重勉強爲善者之罪此何理也執中乃堯舜禹湯之能事孔門中行亦未多得今於爲善者洗垢以索吹毛以求不以爲過必以爲不及而同流合汚者乃以爲中一人唱之十人聚而和之此又何理也夫道晦於衰周之際者楊墨爲之也晦於漢晉隋唐五代之間者佛老爲之也今學者少之所習終身之所誦無非聖人之書而以學道者爲笑一遇規行矩步端顏正色之士則嘲論紛起誹謗橫生遂使學以講道爲諱然則又何暇責彼異端者乎君以宏道爲名凡學於此者其有惕然於心者乎吾有是身因有天命於我者之性學者亦惟盡吾性焉耳盡性之大目則君所謂爲學大道理所以盡之則所謂正功夫者也持此不懈在主敬而察此以惟恐壞之在謹獨吾性既盡然必盡人物之性至於贊化育參天地乃爲宏道之極功而非吾性外事也若徒以舉業爲務以科目爲念以功名顯達自期待毀方瓦合以求避世俗之笑則安用此書院抑豈所謂宏道者哉

國朝道光十年督學周之楨重建記略

云余維書院之興蓋昔之名儒碩德足以儀型一時自偕其徒講明先王之道以淑其身而待世用迨其徒繼承不絕相與追崇其地以誌不忘若康僖公之舉猶有其遺意而宏道之名所由立也今則不然司之以官吏縻之以脩脯所延之師必時之甲乙科而其所教則制義而已於道奚與焉雖然制義者朝廷所以一天下之士潛心聖賢之書俾舍是末由他進而百

家雜說舉不得干其慮者也昔之爲是業者必通經學古驗諸
心術之微而切究乎事物之理然後其辭達焉而卽其辭以檢
其身則高者可漸踐乎道之要而次亦不敢大悖其所習焉自
苟且剽竊之俗成揣摩於形聲格調之閒以冀弋獲而其術日
卑有志之士至用爲詬病非功令之本意也夫人能宏道惟
所自樹立耳天下事慕古而開其名不若因時而旣其實使聚
徒立說標榜爲高竊儒者之近似猖狂以恣其意自謂異於俗
學而不知已軼於道外其弊不又甚乎余承乏兩載輜車所至
必持此論以勸多士蓋欲卽末以探其本於國家興士之意
不無小補今書院之設意豈異此哉抑余重有感者自康僖公
講學此地而後嗣音中絕雖基址幸存而若滅若沒於荒烟蔓
草之閒者且三百年以廢之易而復之之難若此豈不以人哉
今條約雖具顧行之者何如耳使教者視爲故事學者徒利糈
金竟昧夫設科之意而苟以得所欲而已是則使者所滋懼也
夫二十二年督學沈兆霖又倡捐新建東齋號舍四十閒及學
日益齋安學親師之舍同治十二年督學許振禕補修明年督
學吳大澂勸捐增設膏火

伏讀

成廟諭曰各直省書院須認真稽察延請品學

兼優紳士住院訓課其向不到館支取乾脩之弊永遠禁止

按此凡有書院之責者不可不知義學之師亦然

附仰高門銘 門啓何向終南百里來從來遊高山仰止 恭
敬門銘 禮云篤恭語云篤敬出入翼翼庶幾作聖 中立門
銘 君子之教中道而立惟彼能者可以企及 忠孝門銘
克臣惟忠克子惟孝入傳此心出由此道 臥雲門銘 草堂
之門白雲千頃抱道而眠心常惺惺 立雪門銘 小子學道
其心則悅北風孔寒門前立雪 遜志門銘 遜志時敏厥脩
乃來古有明訓及門懋哉 省身門銘 曾子三省終日乾乾
凡門下士各宜勉旃 養蒙精舍銘 升堂入室孔門成法咨
爾蒙師次第以達 日晷銘 惟陽有陰厥名曰晷德業進修
及時無悔 宏道堂銘 浮山之南渭水之北築堂攷經爲我訓則
素王攷經堂銘 攷經餘暇退居草堂俯臨清谷雲影天光
清谷草堂銘 嘉遜素履其居有常居常何所差戾山房清
差戾山房銘 吾軒雖小日處其中一塵不到滿座清風 明月菴
風軒銘 省躬思道東方未發端居以俟一窗明月 渭北書閣銘
銘 大建茲閣渭水之陽藏書萬卷羽翼綱常 庖銘 挾策負
笈多士雲集朝饗夕飧鼎建庖立 庫銘 長府藏物一名曰
庫欽乃攸司孰敢覬覦 寒泉銘 泉由地湧旣冽且寒吾道
一脈資 之以安

嗟峨書院在北城西街明馬谿田理講學處總督唐龍有記久

廢記曰三原馬子理伯循誦先王之法希聖賢之軌典型所昭
風聲斯被其諸弟子員振衣承響其集如雲馬子敝廬不葺
環堵蕭然而弟子多至無所棲止僉事周子鎬行縣而知之撫
然用惻乃議構精舍以尊其教前令王成章曰此實下吏之闕
也西有浮屠氏之宮叢穢伏奸大隳世典盡改邪以崇正乎周
子曰善乃亟命毀之變地以爲基徙材以爲宇僉事桑子溥亦
相厥功考成之責則今令錢士聰克任之規緒旣葺物情用昌
爰命之曰嗟峨精舍竊聞宋邵伯有意井田之制乃買田一方
經畫疆理曰庶幾可興乎今夫浮屠氏之宮連薨接楯盤絡中
土視諸學宮實爲倍之若能悉爲易置以廣賢材以增化本孰
謂家塾黨庠之置鄉舉里選之法不可復耶夫精舍誠足以基
之矣而吾馬子則有邵伯之心者哉乾隆中武功

生員李震川倡建祠宇三楹祀谿田先生道光中馬鳴鑑溫之

樸又募新之

學一草堂李志在龍橋北溫恭毅純聚羣弟子講明精一二貫
兩言因以學一名其堂後公子子知復於此講學久廢

伏讀

高宗純皇帝諭曰書院卽古侯國之學院長必

選經明行修足爲多士模範者以禮聘請生徒必擇鄉里秀

三原縣志
異沈潛學問者酌仿朱子白鹿洞規條立之儀節以檢束身心仿分年讀書之法予之程課使貫通經史庶立品勤學爭自濯磨人材成就足備任使

祖訓昭然立千古學則今之書院何如哉師之所以教弟子之所以學蓋有不然者矣果以

御纂諸經及諸史性理程朱諸大儒書體於身而達於用豈非所以仰酬

諭旨顧僅文詞授受或

適爲負緣奔競之習而已近有應詔請以小學近思錄著爲功令俾士子知所先務不以八比小楷爲科第之階梯而以孝弟廉潔爲學問之根本主講君子與從遊諸生其可不知此哉

小學近思錄此二書者實學問之綱領性理之精華也學者不先讀此是猶入室而不由戶築九層之臺而不大其基者

也胡文敬公謂後世必有以程朱配饗 廟庭者竊嘗僭謂
後世必有以小學近思錄列之學宮與四書六經並垂天壤
今已肇其端矣欲學術之不差幸於此致意焉

風俗我 朝文教覃敷海內同風三原雖號詩書信義之區而
典禮所在學士往往不知民間惟其習之從而已一變至道猶
有待於漸摩鼓舞今依會典 朝賀諸禮縣中所當遵行者
略載於此如呂涇野例以見 國家化民成俗之意而前志辨
論及鄉先達遺言亦附錄之以俟復古者考焉

元旦長至

萬壽聖節朝賀禮會典歲遇三大節在外直省

文武官均設香案朝服望

闕行禮

縣俗凡朝賀日五鼓各官至關廟拜牌禮生贊排

班樂作樂止班齊樂作行三跪九叩首禮樂止興退班坐班樂作樂止起班畢元旦長至前後七日咸衣蟒服聖節亦如之不理刑名上元前後三日咸衣蟒服

迎詔禮縣官朝服帥屬具龍亭旗仗出郭跪迎使者奉設龍亭
內鼓樂前導候過興至公廡陳 詔於堂上正中通贊排班禮

生引各官就階下拜位如朝賀儀紳士耆老軍民皆集贊跪眾
咸跪使者奉 詔西面宣讀訖贊叩興眾行三跪九叩首禮畢

本會典及
禮部則例

鞭春禮會典豫造芒神土牛視歲干支辨其形色以迎生氣占

歲時於東郊縣俗先日縣官帥屬以樂至東門外迎人皆簪花陳芒神土牛設香燭酒

果禮生贊排班各官行一跪三叩禮興領班官奠酒三爵叩興

各官同隸昇芒神土牛香亭鼓樂前導至署陳於堂前各官執

采仗環立牛旁贊擊鼓工播鼓贊鞭春各官環擊土牛三以示

勸耕之義

按會典迎春止用鼓吹采仗其勒令各鋪戶裝演故
事臺閣張鼓樂樹旗幟並科派里長提取車馬優伶

嚴行
禁止

護日食禮依時設香案於露臺上面日設各官拜位於香案北
陰陽官報初虧各官素服入次禮生贊排班班齊跪行三跪九
叩首禮畢退班階下鳴金鼓至復圓乃止各官行三跪九叩首
禮如初禮成退

鄉飲酒禮會典歲以孟春望日孟冬朔日舉行

縣以知縣爲主
擇鄉里年高有

德者一人爲賓次介賓次三賓次眾
賓教官爲司正贊禮執事以生員

先一日設次於庠之講堂

設律令案於堂東司正率諸生習儀設樂於西階下

雲璈一方
響一琴二

瑟一簫四笛四笙四手鼓一拍板一
正月以太簇爲宮十月以應鐘爲宮

至日主人以下均詣學速

賓介既至考鐘伐鼓主人出迎於庠門外賓介東面主人西面
主人揖賓介入眾賓從入三揖至於階三讓乃升主人東階上
北面再拜賓介西階上北面答再拜主人揖賓介就位三賓眾
賓咸就位賓席西北南嚮介西南東嚮主人東南西嚮三賓眾

賓在賓席之西東嚮坐定贊者贊司正揚觶

以下行禮均唱贊

司正由

西階升

通禮作東階

詣堂中北面立賓主以下皆立司正揖眾皆揖

司爵酌酒於觶授司正司正揚觶語曰

恭惟朝廷率由舊章敦崇禮教舉行鄉飲非

爲飲食凡我長幼各相勸勉爲臣盡忠爲子盡孝長幼有序兄弟友恭內睦家族外和鄉里無或廢墜以忝所生

迺畢

飲以觶授司爵揖賓主以下皆揖司正退眾皆坐執事者舉律

令案於堂中讀律令者詣案北面立賓主以下皆立揖如前讀

畢退

通禮律令凡鄉飲酒序長幼論賢良高年有德者居上其次序齒列坐有過犯者不得干與違者罪以違制失儀則

揚解者以禮責之

主人起獻賓席前北面立司爵酌酒授主人主人受

爵詣賓位司饌舉饌案於賓前主人奠爵於席降

賓避席立於主人之左

再拜賓答再拜退復位賓起酢主人席前東面立司爵酌酒授

賓賓受爵詣主人位饌案從賓奠爵於席再拜主人答再拜賓

復位主人起獻介介酢主人均如前儀司爵酌酒獻三賓眾賓

徧賓主以下酒三行司饌供羹司爵以次酌酒司饌供羹者三

畢撤饌案賓主以下皆起主人就東階賓介就西階均再拜賓

介降階出主人送於門外如初迎儀

按呂涇野高陵志有鄉射禮亦最關風化以會典通

禮皆不載暫從闕如

通禮賓主獻酬訖工升歌周詩鹿鳴三章卒歌笙奏

高

宗純皇帝御製補南陔詩辭曰我逝南陔言陟其岵昔我行役

瞻望有父母也倚閭歸則甯止南陔有荀鐸實勺之屏屏孩提

孰嗅味之愼爾溫清潔爾旨肴今爾不養日月其悵補白華

詩辭曰有白者華不污纖塵咨爾士兮宜修其身不修其身迺

貽羞於二人有白者華婉茲靜好咨爾女兮宜修婦道不修婦

道迺貽羞於二老白華匪玉質玉之不緇白華匪蘭芬迺勝之我

顙白華載詠載思白華匪玉質玉之令白華匪蘭芬迺勝之我

顙白華載思載詠補華黍詩辭曰瞻彼阪田厥黍始華胝足

胼手嗟嗟我農夫瞻彼阪田黍華以秀胝手胝足惟勤斯殖茂

華有不秀矣秀有不實矣其雨其雨矣杲杲日出矣怒予愁之

恤矣閒歌魚麗南有嘉魚南山有臺三章笙奏補由庚詩辭

曰王庚便便東西朔南六符調燮八風節宣王庚容容朔南西

東維敬與勤百王道同王庚廓廓東南朔先憂而憂後樂而

樂王庚恢恢南朔東西皇極孰建惟德之依補崇邱詩辭曰

樂王庚恢恢南朔東西皇極孰建惟德之依補崇邱詩辭曰

三川縣志
三
澗松童童蛙黽鄰兮邱草萋萋蕩青雲兮凡百君子慎迺託身
兮澗松童童澗則卑兮邱草萋萋邱則崎兮凡百君子慎迺所
依兮有崇者邱物無不遂有卓者道愚無不智資生育德永植
母替補由儀詩辭曰在上曰天在下曰地君君臣臣父父子
子在下曰地在上曰天父父子君君臣臣由其儀矣物則熙
矣儀其由矣物則休矣迺合樂歌周南關雎三章召南鵲巢
三章卒歌
工告備出

會典鄉飲賓內貢監考職候選者准照應選之職服用頂帽補
褂監生金雀頂青袍藍邊生員銀雀頂藍袍青邊無品級耆民
應穿鮮明常服不得濫用金頂補褂

吾學錄謂鄉飲酒禮重在賓介得人方可示觀感而興教化
然曠典久闕亦未講於禮樂之故欲俗之格於善難哉

宣講

聖諭會典直省府州縣擇適中地爲鄉約所選老

成公正一人爲約正樸實謹守三四人直月按期集所部民宣
講

聖諭擇律中民易犯者咸宣示之守土官實力董率

並飭縣令教職隨時巡行宣導

謹按縣中鄉約久廢麟往與二
三同志遵御纂朱子全書

增損呂氏鄉約行之鄉里及主講書院又刻鄉約書邀集士友行之數年督學吳公并率諸生行於宏道書院爲一時盛舉是亦王康僖刻呂氏鄉約鄉儀以勸鄉人之意果行之久或於人心風俗有小補云

士相見禮會典賓造主人門主人出迎於大門外揖賓賓入及門及階皆揖如初賓西主人東升賓再拜主人答再拜興主人趨正賓坐賓辭固請卒正坐左還賓正主人坐亦如之執事者進茶賓受茶揖辭退揖主人送賓及階及門賓揖辭主人皆答揖遂送賓於大門外揖如初迎儀通禮受業弟子見師長之禮初見師未出先入設席正位俟於堂下師出召見迺奉贊入奠贊於席北面再拜師起答揖興謹問起居命之坐迺侍坐有問則起而對辭出三揖師不送常見侍坐請業則起請益則起師有教立聽命坐迺坐師問更端仍起而對朝入一揖暮出一揖與同學弟子均以齒序會典凡見有服尊親父之執友入門通名命見升階北面再拜尊者西面答揖視尊者所嚮旁侍坐茶至揖辭退三揖皆答揖出不送若尊長來見迎送於大門外行禮坐次如前儀按高陵志云子孫弟姪甥壻見尊長生徒見師奴婢見家長久別四拜近別揖諸親戚長幼久別再拜平交同其鄉黨士農工商平居相見及宴會皆序齒

士庶人冠禮前三日告于祠堂

凡告酒果盥洗出主四拜有告辭

戒賓

擇賢而有禮者

一前期宿賓陳設

衣履三稱設房中東領北上尊設服北無房帷房於廳事之東北冠設西階下西南北上

洗設東階下少東南祝醺字各辭俱設尊几櫛具設衣棹旁冠筵設堂東少北賓筵設堂西主筵設堂東為位主人

階下西面儼立門外西向將冠者適房中南面司洗立洗東西面司冠立冠南東面司尊立尊東祝立司尊南面司服立服南

迎賓

賓立門西贊次其右少退儼告至主人出迎儼從再拜賓賓答揖贊贊報揖讓導賓分庭而行當曲庭中至階皆揖

讓升堂各就位

贊盥洗由西階升立房中西向儼由西階升設冠席於東序立贊北將冠者出房南面

揖將冠者即席始加

將冠者西向跪贊為櫛纚賓降主人亦降賓盥主人揖賓升進冠賓降一等受冠正

容詣將冠者前祝立賓左讀祝賓跪加冠

再加三加二等受冠降

興復位揖冠者適房易服出正容南向賓揖冠者即席贊進

不盥餘乃醺賓者改席於堂中少西南向賓揖冠者即席贊進如前儀乃醺酒賓取酒詣席前北面祝賓左讀祝冠者再拜升

席受盞賓復位答再拜冠者席前跪祭酒興就席末跪啐字于酒興降席右授贊盞南向再拜賓答再拜贊者亦答拜

西階東

賓降階主人亦降冠者南面祝賓左賓出就次冠者見

賓出就次冠者見

按諸辭皆見家禮或

祠堂拜父母及諸尊長出見鄉先生主人禮賓卒禮

別用顯易之語寓勉勵之意亦可
縣俗婚前夕父酌子子跪受名曰冠巾疑卽冠意然又似類於醮

冠者所以責成人之道也冠禮廢天下無成人昔張南軒疑其難行朱子曰冠是自家屋裏事關了門將巾冠與子弟戴有甚難今亦空谷足音矣間同縣中一二友人行之人亦未有甚非之者茲本家禮大意略注儀節願與好禮者講焉

士庶人昏禮縣俗定親似納采下花似納幣前期送妝奩亦如張陳其室然多不能如禮至不親迎尤失禮意朱子曰古禮極省徑人何苦不行又曰吾儕無望復古風俗更教誰變通禮納

采納幣皆具書使子弟爲使者如女氏女氏拜受書告寢具復

書使者復命主人亦拜受如儀

惟士章服一稱幣表裏各四兩容飾合四事食品六器庶人無

章細絹容飾食品均四婦與一乘檐蓋前飾采絹二庶人無飾鐙與鼓樂人均不得過十二庶人不得過八按家禮不用樂會典無品級人及生監軍民不得用執事庶民婦女不得用冠幘大轎主人盛服醮子命之迎壻乘

馬如女家雁及婦輿從其日女氏主人告於寢如儀畢主人位
內堂東主婦位內堂西父醺女如壻儀壻至女家門外主人出
迎壻執雁從入主人東階上西面壻西階上北面奠雁再拜主
人不答拜姆加女景蓋首出壻揖之降主人不降送姆導女升
輿壻乘馬先竢於門婦至降輿壻導婦入室踰闕媵布壻席於
東御布婦席於西壻婦交拜姆脫婦景壻揖婦卽席壻東婦西
坐行合卺禮餽入卒食媵取棗實酒醺壻御取棗實酒醺婦三
酌酒施衾無嫌厥明婦夙興竢見舅位堂東姑位堂西皆南向
婦以贄見於舅姑再拜舅姑受贄婦具酒饌行盥饋禮舅姑就
位婦奉饌舅姑卒食迺醺婦再拜送舅姑酒舅姑卒飲共饗婦
於阼階三日婦見祖禰於寢如薦儀諏日壻以贄見婦之父母
禮壻皆如儀

朱子曰士人欲行昏禮而彼家不從只得婉轉使人與議邱氏曰與議弗從勿與爲昏可也大抵鄙俚無稽之俗昏爲尤甚而婦女守以爲經典不易之規多不足辨惟撒帳鬧房等類極傷風化宜力革之娶日壻插金花披紅帛直成嬉戲朱子曰新壻戴花勝擁蔽其面殊失丈夫容體勿用可也至男女之別防閑最嚴今縣中富室婦女及新婦往往僕童扶行承臂並肩無復羞恥尤屬惡習父兄丈夫曾不之怪而以爲固然古人授受不親果何謂哉

士庶人喪禮初終襲斂○通禮士喪禮疾革書遺言既終子號哭擗踊去冠被髮徒跣諸婦女子去笄期功以下丈夫素冠婦人去首飾皆素服立喪主主婦護喪贊祝諸執事人治棺及凡喪具護喪者使人訃於有司及戚友執事者帷寢設浴牀於尸

牀前襲牀在浴牀西東陳沐浴巾櫛含具含用金銀屑三襲事
陳其旁常服一稱冠及禮服各以其等帶鞞皆備侍者遷尸浴
牀南首諸子哭踊婦人出女喪則男出迺去尸衣覆以斂衾侍
者奉湯及巾櫛入沐浴喪主及諸子止哭舐執事者結襲衣縱
置於牀南領舉尸易牀徹浴牀浴具埋巾櫛及餘水於屏處迺
去衾襲常服禮服加面巾卽牀前爲位立魂帛設奠陳生前所
食脯醢酒果用吉器喪主以下爲位序哭如儀執事奉含具前
喪主起盥含尸訖哭復位越日小斂執事者帷堂陳斂牀於堂
東加斂衣複一禪一複衾一紵紵皆備斂畢遷尸於堂喪主暨
諸子麻括髮加首經腰經皆以麻婦麻髻餘同三日大斂執事
者以棺入承以兩凳棺內奠七星板藉茵褥施綿衾垂其裔於
四外屆時奉尸入棺納生時所落齒髮卷衣以塞空處喪主以

下憑棺哭踊盡哀迺蓋棺加錠施漆比葬月一漆徹斂牀遷柩其處柩東設靈牀施幃帳枕衾衣冠帶屨之屬設類盆帨巾皆如生時柩前設靈座奉魂帛几筵供器具立銘旌題曰某官封未仕則否顯考某府君之柩婦則書顯妣某氏倚靈座之右設斂奠內外序哭如儀及夜奉魂帛復牀諸子次於中門之外寢苦枕塊不脫經帶諸婦女次中門之內幃幔枕衾皆布素哀至則哭晝夜無時 庶人不訃有司襲衣冠帶舄含銀屑三設奠陳酒饌斂複衾一比葬一漆銘旌用絳帛八品七尺九品及有頂帶者五尺庶人無

古人堂皆南向小斂遷尸浴牀大斂置棺於堂首皆向外足皆向內故云南首蓋生者南向棺尙在堂不忍遽以神待之惟遷柩告廟則不敢以足向祖懼褻也今以魂帛朝祖自無

此虞納柩於壙乃用北首所謂參於北方北首之幽之義也
今鄉俗停喪多用北首長爲非是余相友人之喪獨用南首
停柩一時非議騰起甚矣古禮之難行愚夫之難曉也茲據
通禮正之而並附辨如此

成服朝夕奠及祭弔○通禮是日成服輕重以親疎爲等厥明
喪主以下夙興侍者設頽水櫛具於靈牀側五服之人各服其
服就位侍者收頽櫛具奉魂帛出就靈座設奠焚香斟酒點茶
喪主以下哭叩盡哀及夕如朝奠禮侍者詣靈牀舒枕衾奉魂
帛於牀上眾哭盡哀迺止夕奠皆同朔望則具殷饌於朝奠行
之

按士惟朔奠今云朔望皆具且殷奠恐有難備力能爲者從
厚庶人朔望皆不設是奠

啓殯至葬○通禮三月而葬墳塋周二十步封高六尺圍以垣周十二丈墓門石碣員首方趺勒曰某官某之墓無官則書庶士某之墓婦則稱某封氏無封則稱某氏刻墳志作神主及槨製柩輦下爲方牀上編竹格爲蓋四出檐垂流蘇絹荒絹幃杠輦飾紅堊無髮引布二功布一靈車一明器仍各從其俗擇日開兆喪主率諸子適兆所以親賓一人告土神執事者陳酒饌於兆左告者吉服盥就位上香酌酒讀祝行禮如儀遂開墳使子弟一人畱眠之喪主以下還葬有期豫以啓期告於戚友發引前一日厥明五服之人各服其服入就位朝奠訖告遷柩於殯前喪主以下再拜哭盡哀役人入遷柩祝奉魂帛前喪主以下哭從及外堂仍設座於柩前奉魂帛辭於祖禰復於靈座從哭如初夕祖奠如朝奠儀喪主以下哭盡哀親賓致奠行禮如

成服致奠儀賓出喪主以下代哭如初質明五服之人會葬者
畢會執事者陳明器於大門外設鞍馬二納靈車於門內之右
役人舉輿入八品三十二人九品及有頂帶者二十四人設於
廳事正中喪主以下哭踊迺載喪主輟哭視載牢實載訖設遣
奠如祖奠儀役人舁輿祝奉魂帛就靈車奉木版櫬設魂帛後
柩出大門施幃蓋屬引遂發引銘旌前導次明器次靈車輿從
外親分執引布在前喪主以下經杖衰服男在柩旁步從女在
柩後輿從哭不絕聲出城門若里門親賓不至墓者於前途立
向柩再拜役人暫停輿喪主哭謝賓退柩行如初及墓執事者
豫張靈幃於墓右置靈座几筵設題主案於右設藉柩席薦於
壙前鋪陳壙中之事設婦女行幃於羨道之右靈車至幃外止
祝奉魂帛於几上奉主櫬置魂帛側柩車至脫載去幃蓋方牀

下於藉席祝取銘旌縱加柩上喪主及諸子憑棺哭婦女哭羨
道西屆時男女以次哭叩辭訣親賓送者再拜辭喪主及諸子
哭謝遂窆喪主輟哭眡執事者整銘旌藏誌石明器復土喪主
以下哭盡哀執事者陳饌於墓左致祭土神如開兆祭儀喪主
以下就靈幃之左序立祝盥復魂帛於箱啓櫝出木版臥置案
上宗親善書者一人盥就位題主訖祝奉木主於几上設奠焚
香奠酒讀告辭喪主以下哭叩盡哀祝焚告辭奉魂帛埋於墓
側奉主納櫝置靈車而返在途不驅喪主以下哭從如儀庶
人墳塋九步封四尺牆四圍周八丈別製布衾衣柩不施幃蓋
杠輦兩端飾黑中飾紅塋役十有六人

反哭至祔○通禮靈車至家喪主以下哭從入門祝奉木主設
几上諸子在寢東服親序在諸子後婦女哭於房中有弔者如

三原縣志
三
在殯儀迺修虞事執事者具饌品數各以其等主人以下就位
哭主婦薦羹飯主人獻爵讀祝行禮如時薦儀畢主人奉主納
櫛徹哭止眾退百日卒哭儀同虞祭厥明執事者具饌於寢室
如常薦禮設亡者案於祖考神案東南啓室陳主主人率眾先
哭於几筵前奉亡者之主如寢諸子以下哭從及寢門止哭陳
主於東南案上眾序立焚香進饌讀告辭行禮如常薦儀祝焚
告文奉神主復室徹主人奉亡者之主復寢哭隨至几筵前納
櫛訖哭止眾退 庶人虞饌品器數祇薦禮

祥禫○通禮期而小祥忌日行厥明喪主以下及期親就內外
位哭盡哀焚香進饌酒讀祝行禮儀與卒哭同再期大祥先忌
一日設案於寢堂東西各一主人率諸子詣寢堂啓室以遞遷
改題之事告於祖陳設讀祝行禮如時薦儀迺以紙裏應祧神

主陳於西案奉曾祖以下神主臥置東案使子弟善書者一人改題訖復於室遞遷其位虛室中下級以俟闔門出質明主人以下就几筵序哭陳設行禮如初期儀主人奉亡者之主躋寢室再拜闔門徹靈牀靈座罷朝夕奠徹几筵斷杖棄之屏處奉祧主於墓祭而埋於側如儀二十七月既周設几筵於廳事正中主人以下如寢堂啓室奉新祔神主陳於廳事几上祇薦禪事主人及諸子位東壁下舉哀婦女哭於房中焚香薦果饌酒醴讀祝如儀畢奉主復於寢室闔門退諸子素服終月始復常服按聞喪奔喪改葬畧如初通禮凡喪三年者百日不薙髮仕者解任士子輟考在喪不飲酒不食肉不處內不入公門不與吉事期之喪二月薙髮在喪不昏嫁九月五月者踰月薙髮三月者踰旬薙髮在喪均不與燕樂會典凡居喪二十七月

不燕會不鼓樂不娶妻納妾門庭不換舊符 國典所在自當
遵守故備錄之閒與家禮不同者亦當參考

李志弔客給帛古之所無不論親疏槩予孝衫祭奠必在首七
葬期停滯多年盛張供具侈集劇樂竭財乖禮賢者不免司馬
溫公格言曰喪禮散孝爲五服內親一槩散孝非古禮葬時獻
奠盡禮虛靡侈觀總屬無益哀詞輓章情不容已若軸帳滿堂
文多浮諛是亦不可以已乎至於停柩不葬舉殯演戲尤爲人
子者所宜痛自省改明舊志有喪之家親戚鄰里俱以絹布鈔
貫等物餽送其家男婦人各一分謂之收頭王端毅葬夫人蓋
氏卻此不受因謂鄉人曰此非古禮可止鄉人化之至今不復
行

按今陋俗喪事用樂酒肉燕客門掛紙旛柩行以瓦盆擲地

避殃用浮屠停柩不葬釋服從吉喪中嫁娶謝孝信風水異姓爲後皆傷情害理之甚俗之萬不可從者尤當嚴爲禁革以爲世道人心之防

劉九畹家禮補注初喪多於七七百日致祭蓋緣開元禮百日卒哭七日來復之義但不當以葷酒待客程子葬父使周恭叔主客客欲酒恭叔以告先生曰勿陷人於惡喪葬侈用紙錢飾以金銀且爲紙人紙馬之類按朱子語類云紙錢起於唐元宗時王璵蓋古人以玉幣後來易以錢至元宗惑於王璵之說而鬼神事繁無許多錢來埋得璵作紙錢易之唯顏魯公張司業家不用紙錢又云先生每祭不燒紙

按七七及燒紙錢皆佛氏說知禮者亦宜絕之

葬用灰隔者少多用大石數塊砌成如洞用以藏柩謂之石錮

墓朱子語類先生葬長子其壙用石上蓋以尺許五六段橫湊之兩旁及底五六寸許又曰法中不許用石槲故此不敢用全石只以數片合庶幾不戾法

按今富者作石墓雕鐫華侈糜費不貲將啓僭越葬日延生員數人吉衣冠柩前贊禮以爲觀美而禮生亦多責以豐饌盛樂誠何心哉

士庶人祭禮通禮庶士家祭之禮於寢堂之北爲龕以版別爲

四室奉高曾祖禰皆以妣配

高左曾右祖又左考又右

南向前設香案總一

服親男女成人無後者按輩行書紙位耐食男東女西相向事至則陳已事焚之不立版歲以四時節日出主而薦餅餌二槃肉食果蔬之屬四器羹二飯二前期主人及與祭者咸致齋薦之前夕主婦盛服治飯於房中廢鳴鳳興主人吉服率子弟設

香案於南然燭置祭文於堂北設供案二昭東穆西均以妣配位南嚮設祔案於兩序下各一男東女西東西嚮主人以下盥奉木主設於案設祔位於兩序案訖主人東階下立眾各依行輩東西序立主人詣香案前上香畢率在位者一跪三叩興主婦率諸婦出房中薦匕箸醯醬跪叩如儀退子弟奉壺主人詣神案以次斟酒薦熟訖皆就案南跪叩興子弟薦祔位畢主人跪在位者皆跪祝進香案右讀祭文訖興退主人以下叩興再獻主婦薦飯羹三獻主婦薦餅餌時蔬主人斟酒跪叩均如初儀畢主人率族姓一跪三叩興祝取祭文及祔位紙位焚於庭眾出主人納木主徹退日中而餽春一舉布席於堂東西北上陳椅棧匙箸如其人數傳祭食於燕器熱酒饌族姓至主人肅入序位以行輩年齒爲等旅揖卽席進酒饌酬酢如禮湯飯畢

長者告退主人送於門外子弟隨出徹僕人餽餘食皆盡月朔
望日主人及家眾夙興盥洗啓寢室然燭詣香案依行輩序立
上香訖子弟奉茶主人獻茶復位率眾一跪三叩興徹茶闔室
退若家有吉事主人盥洗啓室然燭焚香以其事告行禮如朔
望儀 庶人於正寢北奉高曾祖禰神位歲逢節序薦果蔬新
物每案不過四器羹飯具其日夙興主婦治饌主人率子弟設
案然鐙啓室奉主於案以昭穆序主人立香案前家眾序立於
下以行輩爲先後主人上香一跪三叩興納主於室徹退日中
餽歲一舉論行輩先後同行序齒列坐酒行飲已肅揖以退朔
望獻茶香鐙行禮告事亦如之

李志邑中舊家世族各立祠堂四時享祭俗節獻薦與家禮俱
不相遠惟元旦奠獻懸像中堂十月一日焚紙寒衣冬至門外

焚紙猶沿習俗

明舊志圖經云三原物產阜蕃習俗淳雅民恥爭競有禮遜風
介菴云士勤學問民多商賈婦翁非慶壽賀節不面見長幼雖
疏屬異姓亦有序婚喪有相助之儀時節有往來之禮市肆之
閒無居第居第之所不貿易男不出贅女不招壻藹然有淳龐
之遺非復秦之儻俗矣李志士能敬業城邑鄉井類多絃誦農
惟縣北二峪左右水泉滋潤種植蔬果其利較厚然中人家
不能踰十畝餘勤力作猶未爲累一遇旱虐維正難供工不事
淫巧止供室宇器械之需商賈大則鹽茶小亦負販數年不歸
饒裕之家勸令買地多以爲累萬金之子身無寸土思欲轉移
務本輕末其道良難張志邑號殷繁富商大賈履厚席豐甚至
踐曳綾綺狼藉膏粱此皆各論所見然貧者恥於諂諛富者好

行德惠士知重品民不逋租自昔然矣顧余兒時侍先君每稱述先高祖爲保約正里中少年偶不馴輒走匿不敢見當時風氣敦古處後生見尊長必肅揖若弟子於先師衣冠言動率謹樸近乃尙奇衰飲食微逐好枯中腴外甚且鑽利吸烟不相非儼然儒者口不道詩書聞人言聖賢學若相戒不敢近見繩規士羣訾笑之或曰理學先生蓋鄙夷之也鄉間自遭兵燹人不聊生救死不暇土地荒蕪無力耕作而城市益貪利務詐僞婦女華飾倍前日無所畏避演戲賭博猶未知止又有甚焉噫是可憂已

風俗因時上下固也然國奢示儉國儉示禮移易之權亦自上操之耳誠使臨民者躬節儉敦禮讓爲斯民先而又有鄉先生相與講明聖道以潛孚而默化之雖比隆周漢不難矣

子曰道之以德齊之以禮有恥且格豈不誠然乎哉

三原縣新志卷之四終

卷之四

欽定四庫全書

A vertical strip of a dark, heavily textured surface, possibly a book cover or endpaper, showing significant wear, scratches, and discoloration. The texture is rough and uneven, with many fine lines and larger scuffs visible. The color is a mix of dark brown, black, and some lighter, worn areas.

This image shows a vertical strip of a document page. The paper is heavily stained and discolored, with a dark, textured area running vertically down the center. The edges of the paper are irregular and frayed, suggesting it is a binding or a damaged section of the document. The overall appearance is aged and worn.

三原縣新志卷之五

知縣焦雲龍重修

邑人賀瑞麟編纂

官師志第五

余讀詩至甘棠篇而嘆召伯之德之入人深也後世宦於其地
往往身甫去而民卽忘之若文翁於蜀朱邑於桐鄉龔黃召杜
彪炳史冊豈易言哉然果流風善政卓有可傳據實書之存前
人法後人也至其事蹟無所表見而姓氏未可遽湮具錄之以
俟後之君子云

明以前職官見列史不具書而明則知縣丞主簿典史教諭訓
導二建忠驛丞稅課大使陰陽訓科醫學訓科僧會司道會司

國朝因之一員

訓導

而裁主簿驛丞課使陸稼書謂明代郡邑志

官師多斷自明初宋元以前止存一二蓋功德不足及遠歷久

湮沒亦其勢然也明之官師不能盡載於今猶宋元不能盡載於明今仿其例晉以下載其最著者 國朝則備列之皆見前志其新增者又各以類分志焉

晉一人

杜軫字超宗成都人初舉孝廉除建甯令又除池陽令爲雍州十一郡最百姓爲立生祠得罪者無怨言祀名宦

唐三人

王播字明弼家揚州爲監察御史京兆尹李實表播爲三原令邑中豪強犯法未嘗輒貸課最實重其才更薦之

史憲忠字元貞隴州刺史會昌中築三原城吐蕃因數犯邊拜憲忠爲涇原節度使吐蕃遣使請墮城願以嘗殺使者之人輸塞上憲忠謝曰前吾未城爾犯我地安得禁吾旣城爾殺吾使

爲負宜先取罪人謝我將無所不得今與爾約前節度使事一切置之吐蕃頓服

陳藏器四明人開元中任縣尉著本草拾遺以上皆祀名宦

宋一人

呂大鈞字和叔藍田人初學於橫渠卒業於二程中乙科調秦州司理參軍改知三原有惠政請代父黃入蜀移巴西縣祀名宦

金一人

蕭邦傑令三原有善政清慎才敏極一時之選祀名宦

元六人

趙公諒字允升櫟陽人泰定甲子進士以甯州判官調三原縣尹重建龍橋樓立加封大成至聖文宣王聖號碑作廟學記李

志稱其文章吏治兼擅其長累遷右司郎中進工部尙書

李誠字克誠渭南人辟隴西右憲司史除雲南知事擢尹三原時河南賊寇不軌大兵徂征轉粟挽芻賦役倍他日誠量戶高下而均其徭民無苦病一境安堵

陳思道新安人爲河南行省左丞至正二十六年關中多故以平章張良弼檄移守三原首謁孔子廟立學宮旣宏且麗生徒濟濟文物煥然至今稱之

朱春至正末爲三原尹明兵克奉元春謂其妻曰吾當以死報國妻曰卿盡忠妾豈不能盡節俱投崖死王康僖別立專祠於南門內

雷貴高陵人爲縣主簿猛不殘義寬不宥姦

張繼祖至正年任建鐘樓以上皆祀名宦

知縣明二十四人

陳榮戎縣人永樂元年任撫民慈愛守己廉慎民多稱頌祀名宦

劉耽武定監生朔望詣學宮與諸生講解咸有進益治亦多善政祀名宦

楊聰字彥達雄縣舉人正統元年任剛斷有爲事無壅滯囹圄空虛鋪遞舊從涇陽繞道至本府道路迂遠請改正南事無稽遲邑里二十有八撫卹數載至七年新增崇明廣智永豐三里九年秩滿保畱陞正六品俸仍知縣事民爲立碑祀名宦

朱芾溧水監生景泰三年任平易近民事亦辦集祀名宦

莫謙大興進士天順四年任襟懷灑落見事敏捷善題咏士林稱之

李景鑿字邦泰儀封進士成化六年任慈祥愷悌政務修舉遇節序誕辰許民慶賀亦閒至民家頗受餽遺然民咸愛戴立石頌德陞太僕寺寺丞後遷四川參政過縣士庶戀戀畱十日乃得行祀名宦

張曉撰去思記云邑民四時節禮浮華而禁革以省冗費吉凶大禮過度而戒諭以止奢靡流民間

風來者給以田產窮民不能葬者施以棺木尤究心學校重建大成殿六楹其規壯麗宏敞於前

龐輔鄉甯舉人成化十四年調自奉儉薄注意民瘼剛腸勁骨不媚上官杜私買絕餽送上官怒或誣以他事笞之已而持節如故無所搖奪以此民安業受惠良多後陞知階州士民懷思比之趙清獻包孝肅云祀名宦

馬龍字文祥齊東人以進士授刑科給事中上書忤旨謫岐山丞宏治二年巡撫薦知縣事歷任四年政教兼舉陞汝甯同知民立去思碑祀名宦

張奎撰遺愛記云節操冰霜門無私謁號令金石人有定守重農桑均賦役折獄清

明馭下嚴重修堂建號先拓學宮之規模命題講義成就人才
之放失遇旱虔禱而大雨逢火拜祝而反風 文廟祭器苦窳
易以金錫倉廩棟宇傾頽創之堅良

謝鵬衛輝舉人宏治六年任勤慎能幹得牧民之道祀名宦

林洪博江西南城舉人宏治十五年任重刊邑志

程啓充嘉定進士正德四年任才敏識優政持大體民有罪咎

之不過三杖而已以七杖爲重刑然民皆畏服境內肅清邑有

山西妖人李午以術惑眾將舉兵乃以微罪收其黨午懼而逃

之洛川後洛川事起三原無患擢監察御史祀名宦

呂柟撰去思記云力

正婚喪繩之以禮僧道施食民死弗召若服食踰數並論以法督率髦士濟濟有烝

張治潁川衛舉人嘉靖十四年任數月卽解任去君子稱其恬

退祀名宦

穆甯中字允執號平津進士甫下車廉知俗鮮力本競尙浮華

三原縣志
四
號爲富庶實則非然蹙然曰邑固以虛名而受重困乎乃日勸民力農桑尙節儉又嚴學校絕請謁餽送供應之規鄰邑無不願屬穆君由是受委叢沓奔馳無虛日嘉靖乙卯冬十二月非常地震人死十之三壞屋十之八九盜賊羣起人心洶洶賴公安輯後以丁內艱去民咸思之祀名宦來聘有去思記

高進孝字可愚獲嘉進士萬厯十七年任政清吏肅能詩文與溫恭毅同建橋繕城爲巡按劾去官數載囊無私貯後治兵慶陽道經三原百姓擁轂奉觴悲涕不忍別爲立祠壻南邑人來復有記祀名宦

張應徵字元聘別號停一猗氏人年弱冠登萬厯乙未進士卽任三原時縣隸結郭西黠民爲奸應徵至摘其首惡罪之黨卽解未浹旬才望大著性儉樸食常一簋夫人無繒采邑事悉從

節省三載案無累牘民不飾奸獄無滯冤農有餘積以循績遷南比部去既久民思之爲立石通衢祀名宦

沈琦字仲玉吳江進士補高陵踰月移三原時萬厯二十七年也或曰邑五方民綰轂以居黠猾難治非震懾何以爭長琦答曰三尺俱在奈何以民命立吾名及視事惟教諭風曉德意煦濡之境內遂有寬然無事之樂居五年拜命禮部瀕行衣無增帛篋無畱俸更見廉介之操祀名宦

李棲鳳字翀寰臨晉進士萬厯三十三年任不弛不激按嘗法者數人重寘之法羣奸服慄民愛士附上官薦章十數上五年陞任去祀名宦

何朝宗道州人萬厯三十八年任有循吏聲相傳疏濬三里渠斬木導水勞於民事又大繩諸不法云祀名宦

楊之璋字錫之河內進士萬厯四十年任歲比不登緩征平價民不至大困他如明讞訊均編審蠲贖緩懲黠猾濬河渠至今人猶樂道之祀名宦

姜兆張字省宇掖縣進士下車問民疾苦爲鋤强暴有嫌其風節過峻者則曰稂莠不除嘉禾不生越二年調長安士庶無老幼擁車悲涕不能行後官憲副以勞瘁卒民爲立祠思慕之祀名宦

涂有祐字受伯銅梁進士清慎勤敏政事之暇宏覽博物登山臨水不廢吟咏聽訟迎刃而解凡所剖斷兩造咸服尤嚴城守除盜寇修學宮厚章縫善政不可盡述邑南門外有專祠以誌廉明祀名宦

李昌興濟進士萬厯閒任潔己臨民不污沐操及解綬去行李

蕭然有古循吏風祀名宦

劉昌祥符進士天啓七年任精於吏治案無畱牘民無伏奸值流寇猖獗所至攻陷邑震恐昌乃明偵謀練土著慎封守綏輯持重數載境無恙丁內艱歸邑創祠尸祝祀名宦

陳辰頌字我恂濟甯進士崇正閒任志操清白不染片私緩徵催剔吏弊課士子拯流離勦除彭寨強寇士民去後益思祀名宦

國朝順治閒六人**畢大忠**山西貢生二年任

李溥字雷澤鄆陵人順治乙酉舉人丙戌進士三年任英爽機辯有幹才膽略事無巨細應決不少滯尤善發摘吏民惕息又喜詠諧善默識凡諸紳士姓名行履及其瓜葛姻親雖猥瑣如謔名小字皆能道之時流氛未靖飄忽聚散數伺縣城溥繕城

雉堞增樓櫓練鄉勇遠遊探晝夜乘城守之賊數十至無隙可
投一夕有偵騎報賊期三鼓抵城伏某某爲內應溥神色自若
徐呼更夫密語命通宵以二鼓聲達旦賊候至鷄鳴知謀洩而
遜其守城也舉各方紳士聚城樓以督戍堞之夫常屏燈火從
二三健兒緩步巡視問指一樓曰此非某某分直地耶卽少憩
其中及去又復突至或飲酒談風雅稍及家事就其文質與語
莫不快意自是無敢不夙夜城樓者九年春賊破西鄉王堡恣
剽掠據嶺薛山溥馳檄借兵鎮將馬靜宇搗其巢穴獲三百餘
人盡殺之南郊境得甯息是歲遷戶部主事原人肖像立祠於
學宮左翰林學士岳映斗勒碑記功祀名宦

朱應多山東貢生九年任

張問行

江西貢生十一年任

駱復旦字叔夜浙江山陰明經性敏捷擅文名著有至樂堂詩

集十二年以推官改授至榜其庭曰願爲真父母由是均徭役
擒巨盜令簡刑省與民休息公暇手一編與及門相考訂好集
古石刻校勘真贋歷官三年貧如赴任時會以水利事論逮久
之得白補江西崇仁縣祀名宦

林遜侯官人十七年以明經任律已嚴峻臨民慈祥無纖毫私
寶尤好植士類越六年遷開州邑感其德擬建祠勒碑遜聞切
禁止之祀名宦

康熙閒十五人董遂升貢生四年任陳延祚遼陽正紅旗人七
年任沈礎楹慈谿舉人十年任傅爾忠海州鑲黃旗人十一年
任

徐勅字戢齋鄆縣人康熙癸卯舉人甲辰進士十三年任時平
慶寇逆徵繕供億各上游以軍令悉索三原其他邑乃苦心調

劑嘗身先百姓請命多賴安全又屬意人才雖刁斗傳呼閒猶有相隨問業者越三年內遷中翰後歷官御史祀名宦

翁鼎祖清江吏員十七年任葉章期餘姚籍大興吏員十九年

任張廷獻景州歲貢二十二年任湯爲雯江甯監生二十五年任

俞璉字商臣蕭山人三十一年以靖遠衛經歷陞授下車當歲大饑開倉拯救散粥施粟必躬親胥吏不得作奸全活甚眾又招徠流亡數千戶日履畝勸墾不爲疲訟獄必反覆推勘使無枉屈任七年卒於官邑人士斂金治裝資之歸蓋由吏員通籍公忠清亮絲毫不妄取論者比之況鍾而惠愛及人爲近代名宦第一繼之者爲

李瀛字三山號敬園山陰康熙丁卯舉人甲戌進士三十八年

任時邑苦偏稅里民馮應昌等控闕叩闕情終上達瀛中詳分併三關自是商賈流通稱殷繁矣邑志自王端毅編後中間隨時補苴脫落不完乃倡邑人爲纂修補備一百七十餘年事蹟尤崇文重士後內遷主政邑人以併稅功建恩德祠皆祀名宦顏之珽仁和舉人四十六年任陳大純會稽監生五十七年任張徵九單縣歲貢五十八年任劉子正巴縣廩生六十年任

雍正閒四人呂瑚福山監生三年任劉世熹黃平府進士六年任侯梁鑲黃旗漢軍監生七年任李昌宗孟縣舉人十年任

乾隆閒前志十三人高至行江陰舉人元年任金世綽江浦舉人四年任鍾一元海甯舉人十年任蔡維勸平遠人十七年任王秉韜鑲紅旗漢軍舉人二十四年任李含初廣元拔貢二十七年任

張象魏字月瞻號曉夫廣豐舉人二十九年任學問淵博洞析民情修文廟復書院嚴革里書飛灑催頭侵欺諸弊土工分界把持脚行混拉馱畜尤痛懲之姦丐以小秤小斗欺壓貧民卽禁飭用較準天平斗秤除包糧鋪以杜重索設普濟堂以先無告民甚利之勒石記事而其大者纂輯邑志尤爲有功三山李公云

張思勉鑲黃旗舉人三十三年任

崔龍見蓋守張公象魏舊約而力行者也字翹英號漫亭永濟進士三十一年任茹蘖飲冰易直子諒除里胥無額之賦歲省民二千餘金丐僧不得拘行旅車馬米薪百物道路流通卹惻獨勤聽訟重建櫺星門如制增書院膏火有碑記

顧增華長葛舉人三十七年任任文溥上高拔貢四十年任王

杏舒合肥舉人四十三年任黃四岳正紅旗舉人四十六年任其新增乾隆閒猶有四人而三人皆缺名王某靈石廩生四十八年任陳某江西甯州監生五十二年任周某天津舉人五十五年任任天桂高密副貢五十九年任

嘉慶閒四人楊馨沅邛州舉人四年任趙某大興監生七年任程鵬陽湖附監九年任慈良愛人至今猶有程婆之稱

翟鳳翔字桐墅靈石進士十七年任別釐十餘年逋租去民積累精明強幹數十年稱能吏者無逾焉後陞四川甯遠府

道光閒六人雲麟字蘭舫正黃旗漢軍進士元年任事母孝風雅愛士清查各社倉糧年久侵虧自爲捐辦三十餘石寄存常平不以累民後官至延榆綏兵備道

陳俊儒成縣舉人三年任重學愛士政暇輒親詣書院嚴誨諸

生如其父兄以望誤去官士論惜之

王壬垣蓬萊舉人七年任純雅重儒如陳公試士夫人親造餅分給諸生

孫玉樹江蘇通州舉人十一年任慈惠樸誠公生子富室有餽小兒項飾者公感其意一繫兒項仍謝還之臨去有贐數百金潛置輿中旋知峻卻之鄉嫗餽斗米亦不受固請乃受蓋其廉潔近世罕有比者

陸銓字楷山婁縣監生十五年任周賡盛鎮洋舉人二十三年任有才而性暴信門丁縱衙役民畏之至有冤不敢伸獨治某姓奴欺主母一事重杖問罪人爲之稱快

咸豐閒二人舒鈞字魯一秦州舉人真樸愛人民無怨言

余庚陽字葵階湖北監利進士元年調授後署他邑九年復任

文學政事爲一時冠宦秦三十餘載歷任數邑皆著循聲在三
原前後十年實心愛民至婦孺皆呼爲余爺教士重品行刻朱
子小學分給里塾嚴正自持劣衿刁民皆斂迹然有養雖甚怒
但曰可惡未嘗一惡語嫚罵人微有過舉相知門生或密以聞
輒改正同治壬戌定回亂尤得人心紳商自捐金錢共若干緡
兩備調度鄰邑健兒聞急赴援大破賊立賞三千金力保危城
凡十八月晝夜登陴無一日閒籌餉練勇用白金幾二十萬兩
一委紳士職出內賊平詳請蠲緩征徭上憲批答有涕泗霑襟
語通飭被災各州縣傳視以爲法以守城功保薦循良第一

御展書名

丹毫記注升乾州知州畱辦善後未之任公
憂撫卹無資義紳劉映菁遂出二萬四千金散給闔邑牛種蓋
感公誠意全秦無有也立永遠局以寬里差減加耗歲省民六

七千金或議公取名亦不恤同治初舉孝廉方正特選能符斯典之人書院例課文獨稟撫憲禮延邑貢士某講明正學振興文教並令續纂邑志稿本後署同州知府致仕貧如故主講宏道書院卒三原紳士爲製棺誌石賻送歸柩並繪圖立碑刻詩蓋久而不忘云光緒初祀名宦

同治閒一人朱錫祺廣西博白進士七年任凡三至原前皆以事去後以憂去居心詐僞好修私憾監利余公減加耗已歷數任乃藉故每兩仍增多一錢四分民皆怨之

署篆前志皆不載予謂可載者不能不載也遠莫考近有徵也若無可載仍闕焉其繼賡盛者高傳薪字子良不畱民訟以儉率下吏胥無敢衣帛者繼舒鈞者蕭爲光字航溪峻厲有風骨時禁演戲學憲承差獨違令立召優人箠逐之得罪督學不顧

也涇陽民霸截白渠水不至原者二十餘年親攜襪被止宿三
限口分水上渠涇陽民不敢爭終任每月水輒至繼余公者唐
正恩字需亭巴州刑部主事請叛產房屋撥歸書院以資膏火
性慈良而少明決然守余公減耗未嘗變繼錫祺者前有趙嘉
肇後有庾文潢嘉肇字孚民山東蘭山舉人廉明敏幹善知人
一時敗類無敢至衙署者勤課士尤有好賢風清均糧地專委
任精剖決剔釐邑二百餘年積弊惜未歲事以調簾去文潢字
仙舫湖北鍾祥舉人潔己愛民禮賢下士一出於至誠光緒丁
丑夏甫蒞事旱象見卽不飭一差下鄉催徵旣成災首捐千金
籌賑恤加惠飢民全活甚眾夫人亦捐金釧收遺孩初渭南屈
匪等戕蒲令縣境惡徒聞風糾黨潛煽搶掠勢岌岌不終日密
捕獲之請戮三人而事定尤善收撫涇陽潰勇然性孤直狷介

邑有誣案將痛治之鬱不得伸其志轉亦被誣遂憤懣不自克亦不自白後竟飲藥卒士民聞而冤之至有泣下者

焦雲龍字雨田山東長山進士光緒四年任

夫國家二百餘年而官吾邑者其政績可紀錄尙不能逾有明其間蓋有湮沒者矣不然何其不多也兩漢循良後世多謂難繼于北溟陸稼書非今人耶其宰邑蓋孔門之爲政也人奈何不自勉哉

劉志有題名而無傳張志題名名宦各自成卷今依年次并載之有傳者卽附其下亦古人志例苟欲尙論前人亦可以觀矣張象魏崔龍見舊無傳據諸家碑記補之吾秦如康對山武功韓五泉朝邑呂涇野高陵孫立山富平諸名志官師皆善惡並書所以示勸懲有良史風予師其意而多主揚善

故茲所纂錄如此然或行事可戒亦略書之以警後其現任雖有善蓋有弗得書者謹之也

縣丞明七人仰山洪武二年任有建儒學之功韓士文辛邱人永樂十年任公勤廉潔吏民懷服郭忠徐州吏員宣德八年任熟吏事政公平民多稱之陞秦州同知祀名宦楊能豐潤監生景泰四年任處事安詳有功廟學邢彪字德威曲沃監生宏治四年任博學篤信公廉正直苞苴關節不通一如龐尹而儉過之衣布茹蔬以是終身下鄉收糧勘事自裹乾餼無分毫擾民後考罷去方自餉邊而歸至淳化聞信卽不入邑然貧不能歸居咸甯陋室日誦經籍有得輒筆之意泊然也祀名宦白廷佐興縣監生嘉靖十二年任律身清白無愧民牧魏泰徵字華辰濟甯恩貢崇正閒任潔己愛民細行必矜三載蓮幕有清風皓

月之況皆祀名宦

國朝順治間三人司馬詢高道生四川人沈德普康熙間九人
朱廷楷魏縣選貢六年任清儉自持長厚能容攝邑事半載度
人情土俗以施政教民甚便之陞清澗知縣祀名宦史名臣會
稽吏員周之昌山陰吏員齊七政東阿例監林元燾長樂人二
十八年任守己不污佐治有道嘗呼客傳杯臨流拈咏稱風流
賢吏遷禮縣令祀名宦陶墉秀水人三十年任雅度冲襟才識
敏徹政務井然修舉以憂去皆監生袁祖根山陰吏員王之賓
錢塘人周必達長洲監生雍正間二人查遴仁和人戈居邦南
昌人皆監生乾隆間前志十人夏峯嘉興監生李協中昌邑副
榜張培坤上海人李振祖大興人楊成材四會人李實薰漳浦
人皆監生而實薰善草書修白渠有功有自記見水利篇二十

七年任溫崧曾烏程舉人蔣維炳蕭山副榜侯長熺郟城拔貢董椿青浦監生

新增五人徐基任某李某名皆逸徐廬江附貢李長山舉人荷國琛仁和監生元璣天津拔貢嘉慶閒一人陳元杰仁和監生道光閒四人程柱嘉善人陸芳榮大興人周嘉會吳靖溫縣人皆監生靖好親賢士後保陞安康知縣同治元年川匪破城死之咸豐閒一人馬文龍稷山人回亂守北城城陷遂逸同治閒三人孫繼祖王炳輝涇縣監生屠兆麟宛平監生現以俸滿復任

主簿明三人劉信朔州吏員成化二年任存心平易處事勤能劉純定襄監生宏治六年任勤謹和易起造櫺星門三閒趙昂開州監生正德二年任好恤貧獨不畏高明平居接物怡如愉

如或有關節則千搖百撼不可以動然聲色如常故人以有道稱之當路或委以政事卽所在底績蓋其廉正如龐如邢其寬而栗直而溫則無能同者後陞博興令皆祀名宦

典史**明**一人**程霖**浮山吏員嘉靖六年任今按馬谿田送詩有受檄剪荆棘當道驅豺狼提戈方在郛四境武已揚之句

國朝順治閒三人**孟尙忠****鍾詮****張浩**習詮十五年任知縣駱復

旦擒巨賊其畫策多出之詮陞眉州吏員祀名宦康熙閒十人

聶宗武仇士貞定平人**何士鳳**山陰人十年任時西南不靖環

慶流寇乘閒攻掠諸邑戒嚴士鳳晝清街夜乘城歷勞三載祀

名宦**章宏德**昌平人**周可模**會稽人以下皆吏員**申進舜**中牟

人**李文宗**洛陽人**劉震**考城人**張敦信**柏鄉人**趙廷銓**順天人

雍正閒三人**俞念繼**宛平人**劉應庚**陽曲人**胡松懷**柔人亦皆

吏員乾隆閒前志六人趙城山陰人薛大鵬宛平人林明峻鎮平人皆吏員張瑛宣化西甯監生張峻業大興吏員盧珏錢塘監生

新增二人吳光鶚大興供事侯來勛浮山監生嘉慶閒二人汪某宛平人沈長庚皆供事道光閒三人周世德瀘溪人陳繼曾大興人皆監生陸慶松涿州供事咸豐閒一人鄧澧江甯監生同治閒二人沈國采仁和人秦纘先安徽人皆監生方傳瀛桐城監生光緒五年任

位雖有崇卑官雖有大小然莫不有職焉丞尉亦朝廷命官豈無可自盡者而世多卑小之亦人自卑小耳孔子爲委吏乘田程朱爲簿皆大聖大賢人也劉絢游酢亦嘗爲尉有志者可以奮矣或謂丞尉不得可否事然則若彪若廷楷若

元燾若詮若士鳳又何以稱焉

官以治民師專教士固也然師豈後丞尉孫酉峰曰重之故別之予從其說焉

教諭明六人解鏘棲霞監生永樂十五年任考滿保畱復任明
易詩書三經教訓有方士登賢書捷南宮者甚多張本河內舉
人正統元年任居躬樸誠教誨勤摯劉亮洛陽舉人十二年任
博學善誨諸生賴焉子健隨任受學官至吏部尙書文淵閣大
學士爲一代名臣張奎裕州舉人宏治三年任學規嚴肅訓迪
有方張信陵川舉人十八年任政績未傳以上皆祀名宦申偉
陽曲舉人正德九年任今按張玉坡原贊其像云風度如瓊林
玉樹才華如原泉重淵文章如珠璣玉璫心地如白日青天

國朝順治間五人趙栗平涼歲貢高質斗吳堡恩貢白乃忠鳳

翔人多。大任靈臺人。袁爾佳延川人。皆歲貢。康熙間十人。王恂延川人。李天篤安定人。皆歲貢。黎時雍甯夏人。白補宸清澗人。侯度憲鳳翔人。皆舉人。閻三極肅州歲貢。王衮平涼舉人。姚祖頡延安人。孫佳罷崇信人。皆歲貢。高子穎清澗舉人。有傳者三。時雍字叶徵。八年任文風學規。勵志整飭。造就孤寒尤爲加意。補宸字衮。五十七年任寬厚坦白士。樂近之。造就人才一時稱盛。陞甯夏衛教授。衮字升卿。三十八年任學問淵深。訓迪不倦。陞漢中府教授。皆祀名宦。雍正間三人。宋朝樾隴西舉人。王體正七年任學問優贍。清介不取經其指授者。率掇科第。尤精顏魯公書法。祀名宦。郭子瀚皆蒲城舉人。乾隆間七人。梁鵬程蒲城舉人。劉得炯中衛人。王燕龍城固人。皆舉人。李蔭椿甯夏進士。張爾誠王桂皆朝邑舉人。董廷式洛川舉人。

新增一人李逢泰懷遠舉人嘉慶閒三人陳志經商州人王文衡甯遠人王國祺武威人皆舉人道光閒三人薛兆麟韓城人勤於課士潘登墉華州人魏意醇長武人皆舉人咸豐閒二人崔廷傑三水人劉繼寵朝邑人皆舉人同治閒一人郭維屏澄城舉人曹鍾英延川廩貢光緒四年任

訓導明三人王藻太原人永樂三年任學行優贍訓誨勤苦夜分始寐諸生多有造就段徽懷仁舉人宣德八年任有學有行誨人不倦陞南宮教諭皆祀名宦呂鳴韶解州人舊志逸今補馬谿田修省志與參訂

國朝順治閒七人毛鳳彩延川人王化淳榆林人劉鼎新扶風人武絃周膚施人劉顯府谷人楊馨扶風人李日新興安人皆歲貢康熙閒九人李景耀伏羌人喬琯寶鷄人三十年任渾櫟

樂易不爲曲謹立言持論皆本名儒以年老歸祀名宦張士瑾
洋縣人強勛安定人房世藩靖遠人薛鈞吳堡人閻鎮成縣人
任貢清澗人戴高合水人皆歲貢雍正閒二人柳天眷鄜州人
修宗湯合水人皆歲貢乾隆閒七人王可輔靖遠人左拱極隴
西人馬星生清水人王銑隆德人郭體乾大荔人皆歲貢唐啓
賢淳化人王嵩年靈州人皆廩貢

新增二人田銓乾州舉人康某郃陽歲貢嘉慶閒四人楊承恩
會甯人郭簡合水人皆捐貢呂高聞榆林人張聯翼郿縣人皆
廩貢道光閒五人強振乾韓城廩貢高世猷岐山捐貢李賡廷
洛川廩貢楊懋績鳳縣歲貢懇惻有品卒於官至不能歸諸生
乃助貲送其柩王德銘城固廩貢咸豐閒三人劉三甲扶風歲
貢馮樹勳米脂人王登齡南鄭人皆捐貢同治閒一人李崇仁

朝邑廩貢張嗣祖綏德恩貢光緒四年任

三代設學所以明倫今儒學皆以明倫名堂豈異於古所云耶我朝尊崇聖道遠軼前代周程張朱表揚已至然則卽以聖學教人又誰非之而誰禁之世顧曰科舉時文功令也乃并此不教何也就使教之亦失立學之本意矣人才爲天下根本教官爲人才根本吁可慨已

分防把總前志不載今考自道光以下得五人潘廷柱蔡芝任起林皆西安人起林二十六年任從征湖南髮逆死之朱朝才固原人咸豐中任同治三年又任馬得彪耀州人

三原縣新志卷之五終

三原縣新志卷之六

知縣焦雲龍重修

邑人賀瑞麟編纂

人物志第六上

名臣 忠烈 勇略

稟山川靈異之氣被 朝廷棫樸之休固宜奇才偉士輝映一時易曰觀乎人文以化成天下諒哉原自有明以來若端毅若康僖若谿田若恭毅德業問學非後進之師耶十室之邑必有忠信豪傑之士無文猶興吾烏知今無振拔有爲而不以凡民自待者乎人顧視立志如何耳附列女女有士行扶綱常丈夫有弗若者馬谿田蓋嘗言之

名臣十九人

漢吉茂三國志常林傳注字叔暢馮翊池陽人世爲著姓好書不恥惡衣惡食而恥一物之不知建安初關中始平茂與扶風

蘇則共入武功南山隱處精思數載州舉茂才除臨汾令居官清靜吏民不忍欺轉武德侯庶子後爲武陵太守不之官轉鄴相以國省拜議郎黃初中病亡茂修行從少至長冬則被裘夏則裋褐行則步涉食則茨藿臣役妻子室如懸磬其或餽遺一不肯受雖不以高人亦心疾不義而貴且富者先時國家始制九品各使諸郡選置中正差敍自卿以下至於郎吏功德材行所任茂同郡護羌校尉王琰前數爲郡守不名爲清白而琰子嘉仕歷諸縣亦復爲通人嘉時還爲散騎郎馮翊郡移嘉爲中正嘉敍茂雖在上第而狀甚下云德優能少茂愠曰痛乎我効汝父子冠幘刳人耶

唐李靖唐書本傳字藥師三原人姿貌魁秀通書史仕隋爲殿內直長吏部尙書牛宏見之曰王佐才也高祖定京師秦王引

爲三衛從平王世充以功授開府蕭銑據江陵召靖安輯陳圖
銑十策詔拜行軍總管武德四年閱兵夔州時秋濤瀨漲靖曰
兵以速爲神今乘水傳壘震霆不及塞耳此必禽也銑降或請
籍銑將拒戰者家貲以賞軍靖曰王者之兵弔人而取有罪止
不籍乃度嶺至桂州酋領馮盎等皆來謁南方悉定授嶺南撫
慰大使檢校桂州總管輔公祐據丹陽反召靖入朝授方略東
討靖出不意率黃君漢等輕兵至丹陽公祐懼出走禽之丹陽
平置東南道行臺以爲行臺兵部尙書太宗踐阼授刑部尙書
兼檢校中書令突厥部種離畔帝方圖進取以爲定襄道行軍
總管率勁卒三千夜襲定襄破之進封代國頡利走保鐵山遣
使謝罪請舉國內附以靖爲總管往迎之靖謂副將張公謹曰
詔使到彼虜必自安簡萬騎自白道襲之必得所欲機不可失

韓信所以破齊也督兵疾進遇候羅皆俘以從乘霧行去其牙
七里乃覺部眾震潰頡利亡去於是斥地自陰山北至大漠遂
滅其國尋獲頡利可汗於別部落餘眾悉降遷尙書太僕射會
足疾乞骸骨授檢校就第頌之吐谷渾寇邊以爲西海道行軍
大總管決策深入大戰數十吐谷渾伏允自經死靖更請立大
甯王慕容順而還改衛國公進開府儀同三司薨年七十九贈
司徒諡曰景武按公所著書舊志載三十餘種然多不見今武
經七書有問對三卷子德謩嗣官至將作少匠坐善太子承乾
流嶺南以靖徙吳郡靖兄端字藥王以靖功襲永康公梓州刺
史靖弟客師右武衛將軍累戰功封丹陽郡公致仕居昆明池
善騎射喜馳獵雖老猶未衰年九十贈幽州都督

韓瑗唐書本傳字伯玉三原人少負氣節博學曉吏事貞觀中

以父仲良襲爵永徽三年遷黃門侍郎俄同中書門下三品監
修國史進侍中兼太子賓客王后之廢瑗雪泣極諫不納明日
復諫曰赫赫宗周褒姒滅之臣讀詩至此常輟卷歎息不意今
日親見此禍帝大怒詔引出褚遂良貶潭州都督明年瑗上言
曰昔微子既去殷是以亡張華不死晉不及亂陛下富有四海
安於清泰忽驅逐舊臣遂不省察乎帝愈不聽瑗憂憤自表歸
田里不報顯慶二年許敬宗李義甫奏瑗以桂州授遂良桂用
武地倚之謀不軌於是貶振州刺史踰年卒年五十四長孫無
忌死義甫等復奏瑗與通謀追削官爵籍其家神龍初武后遺
詔復官爵

李朝隱唐書本傳字光國三原人名法中第調臨汾尉擢大理
丞武三思構五王御史鄭愔請誅之朝隱以不經鞠實不宜輕

用法忤旨貶聞喜令遷吏部員外郎時政出權幸內授官但斜封其狀付中書宣所司朝隱執罷千四百員遷長安令宦官閭興貴有所干請曳去之睿宗嘉歎進大中大夫一階以旌剛烈成安公主奪民園不酬直朝隱取主奴杖之由是權豪斂伏開元初遷吏部侍郎銓敍明審久之降滑州刺史徙同州擢河南尹政清嚴姦人不容息太子舅趙常奴怙勢橫閭里朝隱執而榜辱之帝賜慰勉授岐州刺史召爲揚州都督府長史還爲大理卿出爲嶺南採訪處置使卒於官贈吏部尚書諡曰貞

後唐任園五代史本傳三原人明敏善談見者愛其容止李嗣昭節度昭義辟園觀察支使梁兵築夾城圍潞州嗣昭危甚問園去就計園勸嗣昭壁守不可有二心已而莊宗破梁夾城聞園爲嗣昭畫計甚嘉之由是益知名嗣昭從莊宗敗梁兵於胡

柳園頗有功莊宗勞之曰儒士亦破敵耶仁者之勇何其壯也
嗣昭討張文禮戰沒園代將其軍卒以信義降之拜工部尙書
兼眞定尹北京副留守知留守事爲政有惠愛明年郭崇韜領
成德軍節度使改園行軍司馬尋罷之魏王繼岌暨崇韜伐蜀
辟園參魏王軍事蜀滅表園黔南節度使辭不就繼岌殺崇韜
以園代將其軍而旋康延孝反園將三千人會董璋孟知祥等
共擊敗延孝於漢州拜園同中書門下平章事兼判三司是時
明宗新誅孔謙園選辟才俊抑絕僥倖公私給足天下便之與
安重誨議當爲相者二人相惡園求罷職以太子太保致仕退
居磁州朱守殷反重誨誣園與守殷連謀遣人矯制殺之園受
命怡然聚族酣飲而死愍帝卽位贈園太傅

元郝天挺元史本傳字繼先英爽剛直有志略受業於元好問

以勲臣子世祖召見備宿衛春宮裕宗遇之厚屢遷拜中書右
丞與宰相論事有不合輒面斥之成宗崩仁宗以太后命首定
大難及武宗還自朔方遂入正大統定策之際天挺與有力焉
仁宗臨御天挺與張閭等共議大政革尙書省之弊遂成皇慶
之治又出爲江西河南二省右丞召拜御史中丞首陳紀綱之
要以獵爲喻曰御史職在擊奸猶鷹揚焉禽之弱者易獲其力
大者必借人力不然或有傷鷹之患矣帝嘉其言又疏陳七事
曰惜名爵抑浮費止括田久任使論好事獎農務本厲學養士
詔中書省舉行之尋拜河南省平章政事河南王卜憐吉歹爲
丞相待以師禮由是政化大行卒年六十七贈光祿大夫中書
平章政事柱國襲封冀國公諡文定按元史本居安肅州父和
尙拔都魯多著武功爲河東行省五路軍民萬戶卒葬三原遂

家焉今按著有新齋集

明趙天泰表忠記建文元年以明經爲翰林編修壬午出亡之日天泰與焉時衣葛因自稱葛衣翁又號天肖子後老死於蜀韓詩贊曰河西傭葛衣翁負羊裘乞市中夜悲泣傷此衷謝主人死勿桐火埋我西北風

來恭谿田通志洪武中貢士拜御史擢僉都御史彈劾不避權貴有讒恭者高皇私幸其第見其妻績棉恭方荷鋤園中遂誅讒者而益重恭

李節谿田通志字文度永樂年以歲貢授給諫論事務存大體遷四川副使振肅風紀氣節凜然宣德間都督陳懷鎮四川擅作威福嘗置一簿列三司名銜令每日入謁次第作花字眾唯唯惟命節獨毅然不可袖簿出遂抗疏劾其不法數事召懷回

京眾服其剛介尋陞按察使卒

段信谿田通志字宗實有氣節勤學強記正統丙辰進士觀政刑部出任杭州司李廉介不撓獄無寬滯擢御史巡按雲南纖塵不染滇人有詩曰擔頭不帶滇南物只插梅花到處香邑人勒碑名其里曰梅香復按南北直隸監軍口外所至風節著聞英宗朝北虜大舉入寇廷臣交推遷僉都出守紫荆關移守倒馬關極力捍禦邊境賴甯遷大理寺左寺丞

王恕明史本傳字宗貫號介菴正統十三年進士授大理左評事進左寺副條陳刑法不中者六事遷揚州知府天順四年超遷江西右布政使平贛寇憲宗嚴覈天下方面官黜河南布政使侯臣等十三人以恕代臣成化元年南陽荆襄流民亂擢恕撫治之會丁母憂詔奔喪兩月卽視事恕辭不許與尙書白圭

共平大盜移撫河南父憂服除總督河道浚湖修閘因災變請
請求弭災策帝爲賜山東租一年畿輔亦多減免十二年雲南
鎮守中官錢能貪恣甚大學士商輅等議改恕右都御史巡撫
鎮壓初能遣指揮郭景遺安南王黎灝珍奇諸物灝遂欲通雲
南道又交干崖孟密諸土官納金寶無算諸臣畏匿不奏恕遣
騎執景景懼自殺因劾能私通外國罪且盡發能貪暴狀能大
懼急屬貴近召恕還恕居雲南疏凡二十上直聲動天下遷兵
部尙書嚴拒請託同事者咸不悅而錢能歸屢譖帝亦惡恕數
直言命巡撫南畿舊制官田徵半租民田全免後民田歸豪右
官田累貧民恕乃量減官田耗稍增之民田奏以常州羨米六
萬石補夏稅又補他府戶口鹽鈔六百萬贖所部水災奏免秋
糧六十餘萬石周行賑貸全活二百餘萬口二十年復改南京

兵部尙書時錢能亦守備南京語人曰王公天人也吾敬事而已恕坦懷待之能卒斂戢林俊下獄恕言佛至千餘寺費內帑數十萬此外也俊言當不宜罪帝不懌恕論列無少避先後應召陳言者二十一建白者三十九皆力阻權倖天下傾心慕之遇朝事有不可必曰王公胡不言也則又曰公疏且至矣已而果至時爲謠曰兩京十二部獨有一王恕於是貴近皆側目帝亦頗厭苦之會南京兵部侍郎馬顯乞罷忽附批落恕宮保致仕朝野大駭既歸名益高臺省推薦無虛月孝宗卽位廷臣薦召爲吏部尙書陝西缺巡撫恕推蕭楨詔別推恕執奏卒用楨言官多稱恕賢且老宜置內閣參大政帝曰朕用蹇義王直故事何必內閣也恕感激眷遇益以身任國事方以疾在告聞帝頗擢用宦官再執奏竟報許先是中外劾大學士劉吉者必薦

恕吉以是大恚合私人魏璋等共排之恕知志不得行連章求去帝輒慰留特免午朝遇大風雨雪早朝亦免徽王見沛乞歸德州田盧溝橋成中官李興乞進潘俊等官已修京城河橋興復請授四人官五人冠帶壽甯伯張巒請勳號誥券巒妹壻通政經歷高祿超遷本司參議御醫徐生超補院判中書舍人杜昌夤緣遷秩御醫王玉自陳乞進官已得旨恕皆力爭寢之是時劉吉罷邱濬入閣亦與恕不相能太醫院判劉文泰往來濬所求遷官爲恕所沮銜甚恕里居日嘗屬人作傳濬謂其沽直謗君文泰乃訐恕傳中自比伊周以彰先帝拒諫無人臣禮恕以奏出濬指抗言臣傳作於成化二十年致仕在二十二年非有望於先帝也帝下文泰獄鞠之得實置濬不問恕力求去聽馳驛歸廷論以是不直濬及濬卒文泰往弔濬妻叱之出曰以

若故使相公齟王公負不義名何弔爲恕敷歷中外五十餘年
剛正清嚴終始一致所引薦何喬新章懋等皆一時名臣賢才
久廢者拔擢恐後宏治二十年間眾正盈朝職業修理號爲極
盛者恕力也正德三年四月卒年九十三訃聞輟朝贈特進左
柱國太師諡端毅五子十三孫多賢且顯

按公行事史已詳其大節但諸家所記尙多可傳今依張志
附載於後陸廷枝說聽云成化丁酉王公巡撫雲南不挈僮
僕惟行竈一竹食蘿一服無紗羅日給惟猪肉一筋乳豆一
塊時菜一束醬醋水漿皆取主家結狀出示云欲攜家僮隨
行恐致子民怨嗟是以單身自來意在潔己奉公豈肯縱人
壞事人皆錄其詞而焚香禮之烟霞小說云王公鎮滇先
是中官多不法乃百方冀悅之公不爲動政不便人者悉革
之並翦其羽翼中人銜之公每出行部導從者十數人而止
一日公出中人令刺客雜其中將乘隙刺之公於馬上遽曰
今從者何多一人因檢之得其懷刃客吐實因具爰書杖遣
之中人聞之欲自殺公偕三司謂之曰我所行之事不過爲
民除害耳所罪之人不過爲公清惡耳與公何涉母容過自
疑也中人乃惶恐謝罪不敢別行非義而百姓安堵矣雷
禮列卿記云中官王敬乘傳索奇玩恕言當此凶歲宜遣官

賑濟而乃橫求玩好耶上乃械敬下獄戮之哀談云韓魏
公聞更祖宗一法度壞祖宗一紀綱則終日不食富鄭公知
青州活飢民四十餘萬王公自淮揚以至撫南畿其所全活
以億萬計愛君憂國之心發於至誠故知無不言言無不盡
死生以之不但終日不食而已治城客論云王公劾鎮守
中官諸不法事沒其部下所得金寶輸之京師勳臣世帥無
不斂戰所役官軍士民皆還部業使人至齋無敢索賄勢家
假驛傳運私貨者皆自雇役於是聲振遐邇西樵記云王
公爲冢宰署於門曰宋人言受任於朝者以餽及門爲恥受
任於外者以苞苴入都爲羞今動曰贊儀而不羞於入我甯
不自恥哉一時帖然使非眞誠積久而孚亦自不敢書之適
足以增多口矣獻徵錄云恕在吏部訪海內之士隨器薦
用以弼成宏治之治柴虎臣考古類編云恕在職裁抑僥
倖褒獎名節中貴無敢請謁即舊輔萬安輩有所軒輊亦
闕不輒撓王阮亭池北偶談云邱文莊公濬著世史正編
持論嚴正至其爲相則逐三原王端毅公惡莊定山欲誅之
何其明於論古而闇於立身如此王弇州說部云客有問
明之大臣爲誰曰不知也無己于忠肅之任王端毅之直劉
忠宣之篤乎又曰大臣者吾必以端毅爲巨擘焉次則劉忠
宣孜孜爲國知無不言者端毅也孜孜爲國知無不爲者忠
宣也張志云經世編云王公羣經無所不涉獵尤熟於書
詩今考其耄而好學能識其大如啟聖宮雖定議於輔臣張
璵其說實倡於端毅闕里志云宏治元年吏部尙書王恕請
聖廟祀啟聖王以杞國公無繇萊蕪侯點泗水侯鯉洙國公

孟孫氏配享永年伯程昞獻靖公朱松從祀非學有本原何
以及此今按公所著書有石渠意見四卷又一卷拾遺二卷
經籍格言三卷歷代名臣諫議一百二十
卷奏議十五卷文集十六卷詩集十四卷

承裕端毅公第七子也字天宇七歲能詩賦十五從莆田蕭公
學遂深造二十作太極動靜圖說爲名卿傳誦成化丙午鄉舉
完婚自著婚禮用中呈父執而行之恕官吏部令日接賓客以
是周知天下賢才選用無不當宏治六年成進士時端毅致仕
卽歸養正德間任兵垣出理山東河南屯田減登萊糧額三畝
徵一斗還青州彰德軍田先賜王府者三百六十餘頃武宗立
屢遷吏科都給事中會劉瑾專權羣臣多出其門裕獨遠之上
疏乞進君子退小人及諸不法事罰米輸塞上再遷太僕卿會
上於內殿教習武事乃預爲之備一日將大閱降旨用戰馬五
萬裕卽以應命大臣驚曰方旨下懼倉卒無備何處之裕如耶

抑此外尙有餘馬耶裕徐曰尙餘四萬耳咸歎服陞南京太常卿宸濠作亂欲趨南都裕分守通濟門有逆黨潛造甲兵藏郭內將應賊裕覺之按以極刑後賞功陞戶部右侍郎卻其舊用公堂銀千兩言官論禮部尙書席書賑濟事不明往勘功罪昭然帝手書公平正直褒之嘉靖六年爲南京戶部尙書奏准天下罪犯贖金俱納粟穀以備賑濟清釐私充官機匠四百餘名歲省糧四千八百餘石逋稅一百七十萬石積羨銀四萬八千餘兩在部三年致仕先是以進士歸養作宏道書院與羣弟子講理學闡宗旨受業者率多名儒卒年七十四諡康僖詳見明史及谿田通志今按著有論語蒙讀一卷論語近說一卷動靜圖說進修筆錄草堂語錄漫錄厚鄉錄宏道書院志考經堂集庚申集辛巳集星輶集諫垣奏草婚禮用中李衛公通纂刊橫

渠遺書呂氏鄉約鄉儀等書 太極動靜圖說附 太極肇判

乾坤攸位迺旋迺轉陰陽行焉由是生生化化萬物咸備而人生其中得元亨利貞之理爲仁義禮智之性理也者默默然無形可見無聲可聞然賦之於人非動乎其未賦之先蓋靜之謂也人之有性猶天之有理未感而見之於外徒深以存之於內則失其變化之機矣是故象勞兼樂所謂法天而不載者也象安兼壽所謂法地而不覆者也斯皆常人之爲若夫動靜以時無迂焉則與天地爲一矣嗚呼其聖人哉 進修筆錄摘附

枉道以事人匹夫之所爲也直道以事人君子之所爲也豈可只作一場話說 噫母輕言如金石如四時可也 人稟天地之氣以生窮通固在乎命而亦在乎人爲且如一方地雖曰肥饒苟不播之以種其穀必不能自生 聖人可學而至者也可

不敬乎 異端者吾道之蠹賊也 事無大小惟謹乃安 欲

治天下當以求賢爲先務堯舜禹湯文武如無臯夔稷契伊傅

周召則不能成其治矣 欲學聖賢之事業當學聖賢之出處

出處不正雖有事業何足尙哉 人欲仰不愧俯不忤須要謹

言慎行 人猶木也養之則成棟梁失養則爲薪蒸 人有廉

恥則可不然則無所不至矣 心誠實故其言純粹心委曲故

其言譎詐 苟欲齊家事上須要箇敬字馭下須要箇忍字

君能納諫其國必治 觀人之發言如何則知人之存心如何

詩云英英白雲露彼菅茅如何治民之人而使號寒啼飢者

纒屬於道路耶 積金莫如積粟蓋粟可食而金不可食也

世俗之人有譽人而曰此人似古人者吾嘗因是而思之亦嘗

因是而怪之以爲所謂古人者但以其去世久爾然古人未必

皆是仁義之人今人未必皆是無仁義之人豈可以此語而譽人哉 山必有麓無麓則崩河必有源無源則竭木必有根無根則枯惟人也亦然 文王能不顯亦臨無射亦保此所以爲聖人也 國雖安也讒臣一出未有不危家雖富也敗子一出未有不貧欲國久安者當屏讒臣欲家久富者當處敗子 大丈夫立身於天地間豈徒然哉其處也必欲爲一家人之儀型其出也必欲爲一國人之矜式而又欲德同天地名偕日月焉 無私議人之是非無私議人之富貴不惟見自己之無恥抑且起其人之嫌疑 君臣父子人道之大倫也君雖非其君而臣事之不可以不忠父雖非其父而子事之不可以不孝二者之間各盡其道而已矣 心正則身正身正則萬事皆正矣是故正萬事莫如正身而正身又莫如正心也 呂望爲人儼然

喬松之參天也 賞罰者國家之大柄顧其中否何如爾 予
妄發一言日夜愧悚甯有窮乎 凡百事務皆當處之以誠風
俗偷矣天其濇之紀綱紊矣天其振之天理日昧矣天其明之
人欲日滋矣天其遏之不濇而不振不明而不遏吾將焉恃鳴
呼哀哉 麟生而羣獸異鳳出而眾鳥憎彼君子兮豈不亦猶
是乎 人之一身惟心爲主心正則身正心不正則身亦不
正矣天下之大惟君爲主君治則天下治君不治則天下亦不
治矣 凡事只要熟 多見行當審多聞言當謹

張曉谿田通志字光曙孝子景之子也成化己丑進士令襄垣
多善政時有清水明鏡之歌擢監察御史民號泣攀留立祠巡
鹺長蘆兼理河道巡按四川所至汙吏有解綬去者上書論萬
貴妃事同列讀其詞皆縮舌上笞而釋之陞湖廣僉事施州夷

亂眾莫敢往曉請行曰此不可以兵加當以德動之至則宣朝廷恩威亂者咸服遷河南副使河決於黃陵岡奉命督役工竣晉按察使陳州有告毆死少年者三年莫能決曉閱屍圖驚曰安有少年齒豁者乎訊之果捕得少年其屍乃一老乞嫗也事遂白人稱神明以母憂歸卒今按著有靜菴存稿

原曉子也明史本傳字士元正德九年進士授吏科給事中疏陳汰冗食慎工作禁貢獻明賞罰廣言路進德學六事中言天下幅員萬里一舉事而計臣輒告匱民貧故也民何以貧守令之裒斂中臣之貢獻爲之也比年軍需雜輸十倍前制皆取辦守令守令假以自殖又十倍於上民旣困矣而貢獻者復巧立名目爭新競異號曰孝順取於民者十百進於上者一二朝廷何樂於此而受之人君馭下惟賞與罰邇者庸才廝養莫不封

侯腰玉或足不出門而受賞身不履陣而奏功禦敵者竟未沾
恩覆軍者多至逃罪此士卒所由解體也疏入權倖惡之傳旨
謫新添驛丞嘉靖初召復兵科仍加俸一級南甯伯毛良殺其
子錦衣掌印指揮朱震等多違縱原先後論之皆奪職閒住帝
進張鶴齡昌國公封陳萬言太和伯世襲授萬言子紹祖尙寶
丞又以外戚蔣泰等五人爲錦衣千百戶原抗疏極言請行裁
節未幾劾建昌侯張延齡強占民地定國公徐光祚子外戚王
田伯蔣輪昌化伯邵蕙家人擅作威福事雖不盡行權貴皆震
懾進戶科右給事中以議大禮撼門哭再被杖創重卒貧不能
歸葬久之都御史陳洪謨備陳原與毛玉裴紹宗王思王相胡
瓊等妻子流離狀請恤於朝不許隆慶元年贈光祿少卿李志
原在新添驛時學者爭負笈以從居八年日與從游之士講論

經義不輟今按著有蛩鳴稿黃花集玉坡奏議

雒昂雒氏家乘字仲俛號三谷幼受業王康僖之門康僖每奇之謂馬理曰此子心純志篤他日光吾道者也嘉靖癸未進士授太常博士擢吏部給事中未三年疏凡數十奏劾都御史汪鉉迎合張璫黨奸害忠宮禁火乞修省世宗以羽士張鶚金贊仁陞太常少卿極言不可乞收成命直聲著聞出爲僉事歷河南布政使考陞河南巡撫奏議條陳期月間乃六十上徽藩不道服用僭越昂爲劾奏被逮廷杖斃闕下後徽藩事敗隆慶三年六月恤贈戶部侍郎賜祭葬今按著有望洋稿表忠錄

溫純明史本傳字景文嘉靖四十四年進士知壽光縣殲巨寇馬天保墾田勸耕決獄一本經術擢給事中隆慶三年穆宗旣禪除猶不與大臣接純請遵祖制延羣工決章奏屢遷兵科都

給事倭陷廣海衛總兵劉燾以戰卻聞純劾燾欺罔黔國公沐朝弼有罪詔許其子襲爵純言事未竟不當遽襲中官陳洪請封其父母純執不可言官李己石星獲譴疏救之趙貞吉更營制純以政令多門極陳不便遂復舊制俺答請貢市高拱定議許之純謂弛邊備非中國利出爲湖廣參政捐贖鍰拒武崗王之行賄亂宗者遂乞歸萬歷初用薦起河南參議分部南陽約唐府無侵民徭賦境內輯甯人貳罔卿陟棘署晉光祿面規張江陵奪情之非忤意歸江陵沒起守舊官累擢巡撫兩浙改漕折減織造復陂池葺泮宮禁淫祀人情大悅入爲戶部左侍郎督倉場母憂去起南京吏部尙書召拜工部尙書父老乞養終喪召爲左都御史礦稅四出純極論其害不報諸閹益橫純等憂懼不知所出乃倡諸大臣伏闕泣請帝震怒問誰倡者對曰

都御史臣純帝爲霽威遣人慰諭曰疏且下乃退已而卒不行妖書四起大索長安疏言楚宗無反狀請會議而事始決御史于永清按陝西貪懼純舉奏與都給事中姚文蔚比而傾純純疏發永清交構狀語頗侵首輔沈一貫給事中陳治則鍾兆斗皆一貫私人先後劾純御史湯北京不平疏斥其妄純求去章二十上杜門九閤月帝雅重純諭留之三十三年大計京朝官純與吏部侍郎楊時喬主之一貫所欲庇者兆斗及錢夢皋等皆在謫中疏入久之忽降旨切責仍留被察科道官而察疏仍不下純求去益力夢皋兆斗連章許純廷臣大駭爭劾夢皋等俱留中時喬稱純公忠清正南京給事中陳嘉訓等極論二人陰有所恃朋比作奸當亟斥之而聽純歸以全大臣之體帝予純致仕夢皋兆斗亦罷純清白奉公五主南北考察澄汰悉當

蕭百僚振風紀時稱名臣卒贈少保天啟初追諡恭毅今按著有學一堂文集三十卷二園詩集二園學集續集自省錄齊民

要書

按恭毅公疏稿劉燾爲兩廣總督云總兵誤

維遵明史維于仁傳字道行涇陽籍三原人嘉靖中進士吏科都給事中神宗初卽位馮保竊權帝御殿保輒侍側遵言保一侍從之僕乃敢立天子寶座文武羣工拜天子耶抑拜中官耶欺陛下幼冲無禮至此遵乃大學士高拱門生保疑遵受拱指遂謀逐拱遵疏留中尋劾兵部尙書譚綸因薦海瑞吏部尙書楊博稱綸才詆瑞迂滯疏遂寢頃之綸陪祀日壇咳不止御史景嵩韓必顯劾綸衰病張居正素善綸而馮保欲緣是爲遵罪因傳旨詰嵩必顯欲用何人代綸令會遵推舉遵等不敢俱貶三秩調外遵得浙江布政司照磨保敗屢遷光祿卿改右僉都

御史巡撫四川罷歸卒今按著有諫垣奏議二卷

于仁遵長子也本傳字少經萬歷十一年進士歷知肥鄉清豐二縣有惠政入爲大理評事疏獻酒色財氣箴神宗震怒會歲暮留其疏十日明年正旦召見閣臣申時行等於毓德宮手于仁疏授之帝自辨甚悉將置之重典時行等委曲慰解見帝意不可回乃曰此疏不可發恐外人信以爲真願陛下曲賜優容臣等卽傳諭寺卿令于仁去位可也帝乃領之居數日于仁引疾遂斥爲民久之卒天啟初贈光祿少卿按李志云被廷杖削籍歸田與史不合今按著有代警編二卷閱史衷譚國朝名臣品衡歷代人鑒

來復通志字陽伯萬歷中進士起家戶部主事陞郎中提學四川值奢酋亂後考校從寬士子頌之兵備揚州天啟七年秋日

巡鹽御史率僚屬爲魏闡建祠蠲吉上梁俟復至同拜未幾復
一帆競渡眾拭目俟之不意別趨海州矣眾銜之尋闡敗得免
於禍參藩大梁遷山西右布政司治兵雲中北虜邀賞數萬騎
突至城下戎服登陴指揮戰守凡七日夜虜退惓惓借餉修戰
司農告匱憂憤成疾卒於官溫自知曰世之人稱其詩文畫奕
琴方脈諸絕技而不稱忠孝大節蓋不知公者也今按著有詩
文集清源近稿留餘閱餘勞餘諸草

忠烈九人新增十二人

金楊達夫金史本傳字進卿太和三年進士有才幹召補省掾
草奏章坐字誤降平涼府判官主簿鄠縣事一從簡易吏民樂
之達夫亦愛其山水之勝因家焉日以詩酒自娛了無宦情會
有詔徙民東入關達夫與眾行及韶避兵於州地之橫嶺爲遊

騎所執將褫衣害之達夫挺然直立馬首略無所懼稍侵辱之
卽大言曰我金國臣子旣爲汝所執不過一死忍裸袒以黷天
日耶遂見殺兩山潛伏之民竊觀者皆相告曰若此好官異日
祠之當作我橫嶺之神

明焦源清明史焦源溥傳附字湛一由進士歷官宣府巡撫七
年秋坐萬全衛失守奪官謫戍久之釋還年七十李自成陷關
中與從弟源溥同被執勒令輸金抗節不食七日死李志瑞王
婚清力奏從儉革往例數十萬侈費朝端歎服督德州糧歷剔
諸弊一塵不染備兵岢嵐邊烽告驚躬擐甲胄登陴受矢八閱
旬陞山東按察使力反魏璫冤獄遷山西左藩甫下車庫使嘗
以利卽斃杖下撫宣府因忤監視宦寺王坤歸里自成執時加
以嚴刑視之如飴人勸之食笑曰死有重於泰山客憐我而進

食吾何顏見祖宗於地下今按著有組織編雍勝略二書

源溥本傳字涵一萬歷四十一年進士歷知沙河濬二縣考最
召爲御史熹宗嗣位移宮議起刑部尙書黃克纘請寬盜寶諸
閹源溥折之曰光宗神宗元子也爲元子者爲忠則爲福藩者
非忠孝端孝靖神宗后也爲二后者爲忠則爲李選侍者非忠
貴妃三十年心事人誰不知張差持梃危在呼吸尙忍言哉況
當先帝御極之初忽傳皇祖封后之命請封不得治容進矣張
差之梃不中則投以女優之惑崔文昇之藥不速則促以李可
灼之丸痛哉先帝欲諱言進御之事遂甘蒙不白之冤若竟置
弗問不幾於忘父乎李選侍一宮人更非貴妃比如聖諭阻陛
下於煖閣挾陛下以垂簾及凌虐聖母狀第可求曲宥前辜量
從優典而移宮始末不可得而抹殺也盜寶諸閹不可得而寬

宿也若竟置諸闕弗問不幾於忘母乎疏上舉朝寒懼天啟二
年夏歸服闋還朝出按眞定諸府例轉鳳陽兵備副使時崔文
昇出鎮淮西欲甘心源溥遂移疾歸崇正二年起故官分巡河
東道遷甯武參政有平寇功就遷山西按察使七年擢右僉都
御史巡撫大同時邊事日棘兵缺伍餉又乏歲荐饑民淘馬糞
以食源溥請蠲賑增餉當事不能應踰年自劾求去遂罷歸十
六年冬李自成陷關中與從兄源清同被執勒令輸金源溥瞑
目大罵賊拔其舌支解之李志上嘗書名御屏以小焦呼之自
成破關悲憤圖恢復不果被執欲授以三邊總督溥指賊罵曰
爾爲賊我恨未殺汝我朝廷重臣有死無屈莫多語速殺我賊
閉之一室三日夜罵益厲至嚼齒穿齦髭髯盡張賊令左右授
筆書餉銀貸死溥曰瞎賊奴我安得有銀與賊且安得云餉乃

舉筆擊賊中面罵不絕口賊大怒令斷其舌遂磔於市今按著有逆旅集

喬巍通志字維嶽幼從馮少墟溫無知遊學問淹博踐履篤實待異母弟極友居繼母喪盡哀登萬歷進士授司農郎司餉山海關清慎勤勞轉參政出巡川南時奢安二寇畔平之以事左遷僉事尋擢山西冀甯道參政便道過里值逆闖踞西安徵索不少屈與表弟王伯達僕人王崇德同日被害時並稱之

黨還醇明史本傳字子真天啟五年進士授休甯知縣有善政以父憂歸崇正二年服闋起官良鄉十二月大清兵薄城督吏民乘城拒守或言縣小無兵盍避去還醇毅然曰吾守土吏也去將安之救兵不至力屈城破與教諭訓導典史驛丞並死焉事定父老覓還醇尸得之草閒赤身面縛體被數鎗羣哭而

斂之事聞贈光祿丞予祭葬有司建祠官其一子李志署中妾媵友僕死者一十二人

張耀明史本傳字融我萬歷中舉人從學溫恭毅之門知聞喜縣慈惠撫民民爲立祠崇正初歷官貴州布政使張獻忠死其部將孫可望李定國等率眾奔貴州耀急言於巡撫請發兵民守禦巡撫以眾寡不敵難之俄賊眾奄至耀率家眾乘城拒擊城陷被執賊帥與耀皆秦人說之曰公若降當用爲相耀怒罵不屈執其妾媵恠之曰降則免一家死耀詈益甚賊殺之並其家屬十三人今按著有碩寬堂集枕流別集望曰編釋今種輓

歌附

貴陽城崩誰巷戰布政張公奮刀箭手提銀印血糢糊冒陣一呼天地變賊憐神勇欲降公泰山身擲鼎鑊中奮罵

一軍皆辟易舌如電光不敢食大夫羞與賊同生妾媵歎然爭死敵願爲良臣安可得殺身成仁亦何益腐肉如山魂袒裼白

晝賊中猶盪擊

秦三輔通志字陸海萬歷戊午舉人令新城值吳橋兵變直攻新城三輔率眾守陴夜以繼日賊眾城破著衣冠北叩云臣力竭矣惟有隕身以報陛下耳被刃而死

孫璜通志字用謙由歲貢仕鹽山教諭崇正癸未春 大清兵

至左右促璜與知縣同出走璜曰臨難苟免何以爲臣乃偕令手劍臨城分陴拒守已而城陷璜遂自縊鹽山士民私謚曰忠愍

石隆學古堂集字長卿號映昆文學朗弟也年舞象卽能作賦騎劣馬一茶頃馳五十里挾弓抽矢如戲俎豆讀書十行俱下尤精史傳家貧好施嘗周友人之急捐千金不顧也癸未成進士憤時政擬上書爲權貴所遏賊入秦請由宣大阨險據居庸爲上防河守太原爲中策若遏固關最下督師李建泰竟出下

策遂憤鬱成疾避地江南甲申五月間北都陷痛哭數日不語
不食三日死湖口友人劉湘客經紀其喪今按著有春日詠懷
詩

新增國朝張承諫字直庭性至孝繼母譖其妻於父父因不悅
遂出妻中道光辛丑進士由刑部主事陞員外郎素剛直事長
官不阿長官僕恃勢非禮輒笞之莅職勤敏或問之答曰吾欲
致力朝廷過爾優逸何以堪事記名御史特旨簡放肇慶府
署肇羅道時粵匪入境當事堅不出兵承諫卽憤激率募勇拒
賊賊卻走窮追之會賊援大至承諫冒矢石血戰自卯至午身
受八鎗力竭死之事聞賜卹時邑人楊聯捷從九銜在承諫
任所隨承諫帶勇德慶州莫村播植等處堵賊以眾寡不敵力
竭殞命亦經奏准議卹

余聞直庭死時當事議以貪功冒險不欲奏聞聞者從而和之夫謂直庭書生不諳兵機則可然其一死直可愧世之貪生畏事而不忠君父者此而可議則貪生畏事者反得爲賢耶向之封疆大吏聞變雉竄卒不免賊害視直庭何如哉韓昌黎書張中丞傳後謂小人之好議論不樂成人之美千古同一慨也當直庭省親復入京時筮之不吉或許以再筮直庭慨然曰不吉吾將終不行耶徒亂人意何爲然則直庭致力朝廷之志固已素定於中見危授命自問無憾人言豈足重輕哉

王襄字贊臣舉人軀幹短小而義憤勃然奉縣諭在鄉團練聞高陵回變卽率健兒百餘往禦賊眾潰死之同時死者八人而武官坊團首孫秉萬素入行伍性剛正有義氣箭傷二賊與解

三原縣志
田等遇害襄僕杜魁以身護襄死尤慘邑令上襄事得蔭一子
四世襲雲騎尉恩騎尉世襲罔替

王金吾諸生素骯髒傲然自大不屑意人人亦不肯近然直爽
無齷齪態回亂守北關西城發鎗中一賊死反受賊鉛丸不爲
動賊攻益急卽又擲磚石厲聲謂賊曰王老子在此汝欲何爲
已城陷賊出不意砍其背仆至死罵不絕口其日金吾母李氏
弟金聲妻王氏弟生員金鼎在家悉殉難

王栻增生性慷慨帶勇守北關城賊來益眾乃歸家拜母曰兒
不能顧家矣屬弟善事母卽出登陴嚴堵城陷猶巷戰不勝死
王垠字友山歲貢生爲人坦白尙意氣賊破北關與其妻薛氏
衣冠詣家廟焚香拜畢卽分左右對縊死其弟生員塤妻白氏
守志二十餘年亦聞變投井時廩貢張樹衣冠同妻孫氏縊死

貢生王丙照同妻王氏及子張楹同妻呂氏及子皆投井死

劉瑩字玉山副貢生年七十餘言動不苟精研書理一字不肯放過回賊至諭以義理禍福賊卽去旋一賊至又諭之竟直刺瑩大罵死之同里巨在寬張坦與瑩相友善皆七十餘寬亦老貢生聞瑩遇害憤甚見賊輒罵不止賊刃傷之次日賊來問誰罵我者一賊指寬棺曰在此乃啟棺刺腹斷其舌坦雅好士類愛清潔嘗營將就園闢地窩居之聞變卽不逃賊退走哭瑩及寬柩乃大悲曰我何爲獨生歸臥三日不食賊至罵曰豬賊朝廷何負於爾而反乎誓不與汝共生速殺我遂被殺坦學憲書吏

王巍字際唐舉人有孝行賊攻城急衣冠欲自決恐傷母心頃之母赴水死巍亦赴水

李河清字廉堂舉人團練守城城危有人問計清曰讀一場書豈其忘耶旋同妻趙氏仰藥死

張振剛字毅堂諸生有膽略遇事敢爲團練守村城誓必殺賊賊攻村振剛登城樓發鎗斃賊賊怒火城門焚死同難者數十餘人

岳震川武舉會試甫歸卽辦團分守河岸修埭牆公正勤勞送糧涇陽遇賊戰死

朱炳壬戌回亂約鄉中精健百餘人守六吉堡屢挫賊鋒六月三十七月初一兩日賊千餘人攻堡血鬪一日夜力竭被焚死同時死難者四十八人

張潛字少文性豪爽輕財好義喜交遊弱冠補諸生以訓導改捐同知分發甘肅會同治壬戌夏四月髮逆由南山竄陝旣東

颺回變作三原城內回民數百家洶洶蓄異謀高陵失守獲賊
謀密告邑侯余公亟清內患時里俠宋成金募勇入殲之事定
而外賊攻益急三關陷丞佐有逃者城紳亦多出走居民自焚
火起城中益鼎沸余公失計欲自縊潛獨堅請登陴嬰守且馳
白其姊胡礪鋒郎中母慨出五萬金固人心賓陽橋之捷卽賞
外勇金三千兩由是城得無虞多潛策也當城急時有勸潛去
者正色曰守先人祠廬如官守土且我策名雖在籍亦烏可去
蓋有定識定力云以積勞邁疾逾年卒事上照同知軍營病故
例 賜卹 贈知府銜並蔭一子州判軍興以來守城查門尤
爲出力亦以積勞病故均經請卹者又有營兵姚德信生員劉
需張玉琯

嗚呼壬戌之變吾邑殉難人士蓋不可勝數矣若諸人者或

慷慨殺身或從容就義或積勞病故僅能詳其死事如此吾
爲志必信而徵惜哉然使忠義之氣竟湮鬱而弗彰又奚可
也故並錄其婦女死節之最著者於列女而餘則見雜記篇
勇略十人補一人新增二人

北周毛遐北史本傳字鴻遠曾祖天授定州刺史始昌子傳至
遐四世不絕正光中蕭寶夤討關中諸賊以遐爲府長史寶夤
敗還長安三輔騷擾遐因辭還北地與弟鴻賓聚鄉曲豪傑東
西略地民羌多赴之共推鴻賓爲主旣而賊帥宿勤買奴自號
京兆王遐與鴻賓縱兵追擊七柵皆平後寶夤構逆謀遐知之
乃寄書與鴻賓索馬迎接復於馬祗柵建旗鼓以拒寶夤攻其
將盧祖遷禽之詔授遐南幽州刺史又攻破其將侯終德寶夤
知內外勢異輕騎走巴中孝武帝入關稍遷驃騎大將軍儀同

三司卒

鴻賓遐弟狀貌頗異昆季之中尤爲輕財好施及賊起與遐一守一戰後拜岐州刺史明帝以鴻賓兄弟所定處多乃改北地郡爲北雍州三原縣爲建忠郡以旌之後爾朱天光自關中還洛鴻賓領鄉中壯武二千人以從拜西兗州刺史羈寓倦游之輩四座常滿鴻賓資給衣食與己悉同轉南青州刺史未幾徵還孝武帝與齊神武有隙令鴻賓鎮潼關車駕西幸漿糗乏絕鴻賓奉獻酒食迎於稠桑武帝把其手曰寒松勁草所望於卿仍留守潼關

鴻顯遐乳母產也養爲弟因姓毛氏位散騎常侍勁悍多力後隨諸兄戰關多先鋒陷陣大統四年爲廣州刺史鎮東陽陷東魏卒俱見遐傳

唐劉宏基唐書本傳少以蔭補隋勳侍大業末從高祖攻下西河宋老生敗棄馬投塹宏基斬其首拜右光祿大夫師至蒲先濟河下馮翊爲渭北道大使命殷開山副之西徇扶風眾至六萬南渡渭次長安故城隋將衛文昇來拒時諸軍尙未至宏基最先勝高祖悅賜馬二千匹京師平功第一授右驍衛大將軍討薛舉戰淺水原八總管軍皆沒惟宏基一軍力戰矢盡爲賊拘帝以臨難不屈優護其家仁杲平始克歸官之如初劉武周犯太原從秦王屯柏壁以勁卒二千由隰州趨西河躡賊歸路賊銳甚宏基堅壁儲勇及宋金剛遯走率騎尾之介休與王合擊大破之累封任國公從擊劉黑闥還除并越將軍會突厥患邊督步騎萬人備塞自邠北東拒子午嶺西抵臨涇築障遮虜貞觀初李孝常等謀反坐與交除名歲餘起爲易州刺史復封

爵召授衛尉卿改封夔國公以老乞骸爲輔國大將軍太宗征遼召爲前軍大總管戰駐蹕有功累加封戶至千一百卒贈開府儀同三司并州都督陪葬昭陵圖形凌烟諡曰襄子仁貴襲封

元楊子江谿田通志元世祖攻襄陽不克子江用礮擊破其城取之官封便宜都元帥護國進義武莊公

仇敏谿田通志字好古甘肅行省照磨提舉都城所副使歷奉元路總管封南陽郡侯

明薛經字平遠號近峯幼好騎射神明孫吳兵法慨然以伏波自任西夏劉訥亂籌畫制勝報捷賜飛魚緋衣授鎮撫又授西安後衛統轄各屬倉旗屯糧軍籍雜務襲指揮免合族軍徭征火落赤眞相台吉深入敵境火酋內向遂寢戈漠南茶賊叛用

計禽之授漢中守備轉調靖遠衛守備時邊患亟卻之遷四川都指揮僉事體統行事雲南土官阿克等入境截殺有功保奏擢四川行都指揮使司指揮張惟忠誣以罪姪大中力請昭雪以前功陞山海關參將卒於官補

溫編張志恭毅弟也修幹岳立爲諸生有聲庠序會甯夏變亂改從戎萬歷中守備漢南潔已奉公明而能斷郡邑有訟咸就剖焉居鄉時恭毅建橋施粥築兩城修學宮早夜經營傾囊解衣以成之

國朝梁加琦通志字玉鉞安塞人籍三原成童時喜韜略及長技勇絕人順治元年由將材隨八固山攻取太原屢膺前鋒陝督孟喬芳奇其才薦授遊擊三年以姚黃張獻忠等殘蜀加琦駐略陽餽運川餉時糧董徵應招買河西一帶動以萬計加琦

會知縣王業泰請修倉廩百閒以儲造船數百艘濟運蜀平晉副將十七年率兵攻川東擒斬僞總兵陳貴榮等康熙元年臺議設總統彈壓諸軍特授加琦全蜀勦撫總統入營總兵官管左都督事勦平山西逆寇五年攻取太昌賊袁宗第搗其巢撫降僞新化伯馮起鳳是年十二月攻殺逆黨萬餘於巫山賊首劉二虎自縊遂平晉秩一品恩蔭有加

來講李志順治己丑武進士授郎撫旗鼓守備南漳賊發率偏師搗其穴賊解散復單騎諭降萬餘人賊再犯太和伏兵夜出斬首三百餘遷廣西梧州游擊

常日暄通志康熙十四年滇逆方熾慶陽土寇作亂犯涇陽三原攻馮家堡三晝夜將陷日暄同魏良佐蔣四等率鄉兵一十八人往援殺賊數十賊撤圍合營並力衝殺日暄力戰鞭死渠

三原縣志
魁並賊黨數人眾寡不敵十八人俱戰死馮堡獲全

新增王登福上王堡人有膽力善技勇同治二年二月二十六日與回賊遇於趙氏河側時從行者三十餘人而賊亦二十餘登福一人接仗左右格殺用矛如飛賊大驚卻走三十餘人卒皆脫免登福後以賊眾受傷未幾死

穆世文素能爲鄉人排難解紛皆呼爲老鄉約回亂率鄉人避寺坡地窖中獨守窖口賊至與鬪三日夜身受傷三十餘處賊卒不得窺得生者數百人復修文勝寨鄉人賴之世文死頌其德不忘



